



---

## **PEKELILING AKADEMIK BILANGAN 5 TAHUN 2022**

---

**PINDAAN PERATURAN AKADEMIK DAN PANDUAN  
SISTEM PERATURAN AKADEMIK BAGI PROGRAM IJAZAH  
SARJANA MUDA DAN DIPLOMA SEPARA MASA  
UNIVERSITI TEKNIKAL MALAYSIA MELAKA (UTeM)**

Pejabat Pendaftar  
7 April 2022

Disalinkan kepada:

Naib Canselor  
Timbalan Naib Canselor (Akademik & Antarabangsa)  
Timbalan Naib Canselor (Penyelidikan & Inovasi)  
Timbalan Naib Canselor (Hal Ehwal Pelajar)  
Penolong Naib Canselor (Jaringan Industri & Masyarakat)  
Penolong Naib Canselor (Pembangunan & Pengurusan Fasiliti)  
Pegawai-Pegawai Kanan  
YDP Majlis Perwakilan Pelajar

# **UNIVERSITI TEKNIKAL MALAYSIA MELAKA**

UTeM.100-1/3/6 (16)

7 April 2022

## **PEKELILING AKADEMIK BIL. 5/2022**

### **PINDAAN PERATURAN AKADEMIK DAN PANDUAN SISTEM PERATURAN AKADEMIK BAGI PROGRAM IJAZAH SARJANA MUDA & DIPLOMA SEPARA MASA UNIVERSITI TEKNIKAL MALAYSIA MELAKA (UTeM)**

#### **1.0 TUJUAN**

Pekeling Akademik ini bertujuan untuk memaklumkan kepada semua staf Universiti Teknikal Malaysia Melaka (UTeM) mengenai penambahbaikan Peraturan Akademik dan Panduan Sistem Peraturan Akademik bagi Program Ijazah Sarjana Muda & Diploma Separa Masa UTeM.

#### **2.0 LATAR BELAKANG**

- 2.1 Edisi pertama Peraturan Akademik Bagi Program Sarjana Muda dan Diploma Separa Masa UTeM telah mendapat kelulusan Mesyuarat Senat Bil. 3/2017 pada 29 Mac 2017. Peraturan Akademik Program Separa Masa ini telah diguna pakai bermula kemasukan pelajar Semester I Sesi 2017/2018.
  
- 2.2 Penambahbaikan Peraturan Akademik dan Panduan Sistem Peraturan Akademik Bagi Program Ijazah Sarjana Muda & Diploma Separa Masa UTeM telah diluluskan dalam Mesyuarat Senat Bil. 12/2021 yang bersidang pada 23 Disember 2021 selanjutnya disahkan oleh Mesyuarat Lembaga Pengarah Universiti (LPU) Bil. 1/2022 pada 14 Februari 2022.

- 2.3 Pelaksanaan program Separa Masa ini adalah selari dengan Pelan Strategik UTeM daripada aspek pembelajaran sepanjang hayat. Di samping itu, program ini juga dapat membina dan mengekalkan kelestarian perhubungan strategik di antara UTeM dengan institusi pengajian tinggi, industri dan masyarakat luar.
- 2.4 Urusan pentadbiran Program Separa Masa ini diuruskan oleh Pusat Pembelajaran Sepanjang Hayat (PPSH), manakala kawalan kualiti program dan hal ehwal akademik adalah di bawah tanggungjawab Fakulti/Institut.
- 2.5 Penambahbaikan yang dilakukan adalah selaras dengan perkembangan semasa program akademik dan pelaksanaan keputusan-keputusan dasar yang telah diputuskan oleh Universiti.

### **3.0 PERATURAN AKADEMIK DAN PANDUAN SISTEM PERATURAN AKADEMIK BAGI PROGRAM IJAZAH SARJANA MUDA DAN DIPLOMA SEPARA MASA UNIVERSITI TEKNIKAL MALAYSIA MELAKA (UTeM)**

Penambahbaikan Peraturan Akademik dan Panduan Sistem Peraturan Akademik bagi Program Ijazah Sarjana Muda dan Diploma Separa Masa Universiti Teknikal Malaysia Melaka adalah seperti di Lampiran.

### **4.0 TARIKH KUAT KUASA**

Peraturan Akademik dan Panduan Sistem Peraturan Akademik bagi Program Ijazah Sarjana Muda dan Diploma Separa Masa Universiti Teknikal Malaysia Melaka berkuat kuasa mulai ia dikeluarkan.

Sekian, terima kasih.

**“WAWASAN KEMAKMURAN BERSAMA 2030”**  
**“BERKHIDMAT UNTUK NEGARA”**  
**“KOMPETENSI TERAS KEGEMILANGAN”**

Saya yang menjalankan amanah,



**MASDZARIF BIN MAHAT**  
Ketua Pegawai Operasi  
Universiti Teknikal Malaysia Melaka

**PERATURAN-PERATURAN AKADEMIK BAGI PROGRAM IJAZAH SARJANA  
MUDA DAN DIPLOMA SEPARA MASA**  
**UNIVERSITI TEKNIKAL MALAYSIA MELAKA (UTeM)**

**MUKADDIMAH**

Dokumen ini menggariskan dasar-dasar yang dibuat oleh Senat untuk menjamin standard pendidikan dan pengijazahan program pengajian Ijazah Sarjana Muda dan Diploma Separa Masa di Universiti Teknikal Malaysia Melaka (UTeM). Dokumen ini diterbitkan kepada semua pelajar, Fakulti dan staf, yang semuanya bertanggungjawab untuk membaca dan mematuhi dasar-dasar ini.

## **KANDUNGAN**

<b>BAHAGIAN</b>	<b>PERKARA</b>	<b>MUKA SURAT</b>
BAHAGIAN I	Definisi	1
BAHAGIAN II	Sesi Akademik	8
BAHAGIAN III	Pendaftaran Program	9
BAHAGIAN IV	Pendaftaran Kursus	10
BAHAGIAN V	Sistem Kredit	12
BAHAGIAN VI	Sistem Gred	17
BAHAGIAN VII	Penilaian	18
BAHAGIAN VIII	Kedudukan Akademik	21
BAHAGIAN IX	Senarai Dekan	23
BAHAGIAN X	Syarat Penganugerahan Ijazah Sarjana Muda atau Diploma	24
BAHAGIAN XI	Penangguhan Pengajian	25
BAHAGIAN XII	Penggantungan Pengajian	26
BAHAGIAN XIII	Permohonan Berhenti dari Pengajian	27
BAHAGIAN XIV	Penyelewengan Akademik	28
BAHAGIAN XV	Tata tertib Peperiksaan Akhir Semester	28
BAHAGIAN XVI	Hukuman	32
BAHAGIAN XVII	Yuran Pengajian dan Lain-lain Yuran serta Caj	33
BAHAGIAN XVIII	Peruntukan – Peruntukan Am	35

## **BAHAGIAN I**

### **1. DEFINISI**

**“Aegrotat”** ertinya pemberian status lulus dan memenuhi syarat penganugerahan Ijazah Sarjana Muda atau Diploma kepada mana-mana pelajar yang tidak menamatkan pengajian kerana hilang keupayaan secara kekal atau telah meninggal dunia tertakluk kepada Polisi Penganugerahan Ijazah, Diploma, Sijil dan Kepujian Akademik Lain Secara Aegrotat dan Anumerta.

**“Anumerta”** ertinya penganugerahan sesuatu ijazah, diploma, sijil dan kepujian akademik lain kepada seseorang pelajar selepas beliau meninggal dunia tertakluk kepada Polisi Penganugerahan Ijazah, Diploma, Sijil dan Kepujian Akademik Lain Secara Aegrotat dan Anumerta.

**“beban kredit”** ertinya jumlah bilangan kredit kursus yang diambil oleh pelajar di dalam sesuatu semester.

**“CGPA”** (*Cumulative Grade Point Average*) ertinya purata himpunan mata nilai yang diperolehi bagi semua semester yang telah diikuti.

**“Dekan”** ertinya Ketua Fakulti yang dilantik oleh Naib Canselor Universiti.

**“Fakulti”** ertinya Pusat Tanggungjawab yang diberi tugas oleh Senat bagi menjalankan program akademik dan memperakarkan penganugerahan Ijazah Sarjana Muda atau Diploma kepada pelajar.

**“Gap Year”** ertinya tempoh penangguhan pengajian pelajar mengikuti aktiviti khidmat negara, kesukarelawanan dan umum bagi tempoh minimum tiga (3) bulan sehingga tempoh maksimum satu (1) tahun.

**“GPA”** (*Grade Point Average*) ertinya purata mata nilai gred yang diperolehi dalam sesuatu semester.

**“gred”** ertinya abjad bagi menunjukkan pencapaian pelajar dalam sesuatu kursus.

**“IPT”** ertinya Institusi Pengajian Tinggi.

**“Jam pertemuan”** ertinya sesi pengajaran dan pembelajaran rasmi yang dijalankan secara bersemuka.

**“JKL”** ertinya Jumlah Kredit Lazim yang ditentukan oleh Fakulti untuk sesuatu tahun pengajian.

**“KB”** ertinya Kedudukan Baik.

**“Kedudukan Akademik”** ertinya kod yang digunakan bagi menyatakan Kedudukan Akademik pelajar.

**“KBA”** ertinya Kedudukan Baik Anugerah.

**“KBTB”** ertinya Kedudukan Baik Tanpa Bahasa Melayu.

**“KBTM”** ertinya Kedudukan Baik Tanpa MUET.

**“KBTT”** ertinya Kedudukan Baik Tamat Tempoh.

**“Kemasukan Terus”** ertinya pelajar yang boleh dipertimbangkan mendapat pindah kredit dan diterima masuk ke semester yang bersesuaian berdasarkan kepada kelayakan terdahulu dan diluluskan oleh Universiti.

**“Kerja Kursus”** ertinya sebarang bentuk penilaian yang dibuat dalam tempoh perkuliahan sesuatu semester.

**“KG”** ertinya Kedudukan Gagal.

**“kredit”** ertinya unit ukuran beban bagi sesuatu kursus.

**“Kredit Dapat”** ertinya jumlah kredit yang diperolehi bagi kursus yang lulus termasuk kursus yang diluluskan Pindah Kredit.

**“Kredit Kira”** ertinya jumlah kredit yang diambilkira dalam pengiraan GPA dan CGPA.

**“kredit untuk bergraduat”** ertinya jumlah kredit minimum dalam struktur kurikulum yang ditetapkan oleh Fakulti dengan kelulusan Senat yang pelajar wajib lulus untuk bergraduat.

**“KS”** ertinya Kedudukan Bersyarat.

**“kurikulum”** ertinya susunan kursus bagi sesuatu program.

“**kursus**” ertinya ialah komponen-komponen sesuatu program.

“**Kursus Audit**” ertinya mana-mana kursus yang diambil oleh pelajar yang bukan merupakan keperluan kurikulum program yang sedang diikuti.

“**Mata Nilai Gred**” ertinya nilai angka setara bagi setiap gred.

“**Kursus Elektif**” ertinya kursus pilihan yang ditawarkan dalam sesuatu kursus bagi memenuhi syarat pengijazahan.

“**Kursus Wajib Universiti**” ertinya kursus yang ditentukan oleh pihak Senat yang wajib diambil oleh semua pelajar.

“**Kursus Terbuka Leluasa Dalam Talian (MOOC)**” ertinya kursus dalam talian yang disasarkan untuk diikuti secara leluasa tanpa had dengan akses terbuka menerusi web.

“**Micro-Credentials (MC)**” ertinya pensijilan digital tentang pengetahuan, kemahiran dan kecekapan yang dinilai dalam bidang tertentu. Ia boleh menjadi komponen program akademik atau kursus mandiri yang menyokong kepada pengembangan profesional, teknikal, akademik dan peribadi seseorang. Seseorang akan diberi sijil digital atau ‘lencana digital’ setelah selesai sesuatu kursus MC.

“**MUET**” ertinya Malaysia University English Test.

“**pelajar**” ertinya individu yang telah menyempurnakan pendaftaran untuk mengikuti sesuatu program.

“**Pelajar Baharu**” ertinya pelajar yang telah mendaftar sebagai pelajar di Universiti dan berada di tahun satu semester pertama termasuk pelajar Kemasukan Terus.

“**Pelajar Kanan**” ertinya pelajar yang telah melalui sekurang-kurangnya satu (1) semester pengajian di Universiti.

“**Pelajar Khas**” ertinya pelajar tahun akhir yang mendaftar hanya satu kursus yang pernah diikuti.

“**pembelajaran terdahulu**” ertinya ilmu pengetahuan, kemahiran atau sikap yang diperoleh sebelumnya dan mencakupi pengalaman terdahulu.

“**Penangguhan Pengajian**” ertinya status pelajar yang tidak mengikuti pengajian pada sesuatu semester atas sebab-sebab tertentu dengan kelulusan Universiti.

**“pengajian”** ertinya peringkat pembelajaran untuk mendapatkan Ijazah Sarjana Muda atau Diploma.

**“Pengakreditan Pengalaman Berasaskan Pembelajaran Terdahulu (APEL)”** ertinya satu proses sistematik yang melibatkan pengenalpastian, dokumentasi dan penilaian pengalaman pembelajaran terdahulu iaitu pengetahuan, kemahiran dan sikap, untuk menentukan sejauh mana seseorang telah mencapai hasil pembelajaran yang diinginkan, dan digunakan untuk mengakses ke sesuatu program pengajian dan/atau untuk anugerah kredit.

**“Pengakreditan Pengalaman Berasaskan Pembelajaran Terdahulu Bagi Tujuan Penganugerahan Kredit (APEL Credit (C))”** ertinya penganugerahan kredit berdasarkan pengalaman pembelajaran terdahulu kepada sesuatu kursus di dalam sesuatu program pengajian yang terakreditasi yang ditawarkan oleh sesebuah penyedia pendidikan tinggi. APEL (C) menyediakan mekanisma untuk mengiktiraf pengalaman pembelajaran yang terdahulu seseorang individu yang relevan dan khusus kepada sesuatu kursus yang terkandung di dalam sesuatu program pengajian. Kredit tersebut dianugerahkan berdasarkan pengetahuan dan kemahiran yang diperolehi secara pembelajaran bukan formal dan tidak formal.

**“penggantungan pengajian”** ertinya status pelajar yang tidak dibenarkan mengikuti pengajian pada sesuatu semester atas sebab-sebab tatatertib dengan arahan Universiti.

**“Penilaian formatif”** ertinya sejenis penilaian kemajuan seseorang pelajar sepanjang kursus, di mana segala maklum balas daripada aktiviti pembelajaran digunakan untuk menambah baik pencapaian pelajar berkenaan.

**“Penilaian sumatif”** ertinya satu ringkasan penilaian kemajuan pembelajaran seseorang pelajar pada sesuatu jangka masa tertentu dan digunakan untuk penggredan kursus pelajar berkenaan.

**“Peperiksaan akhir”** ertinya penilaian yang dibuat ke atas pelajar pada akhir semester untuk mengukur pencapaian akademik pelajar.

**“Peperiksaan Khas”** ertinya peperiksaan gantian bagi Peperiksaan Akhir.

**“perkuliahahan”** ertinya aktiviti pengajaran dan pembelajaran dalam satu tempoh yang ditetapkan.

**“Pindah Kredit”** ertinya proses pemindahan kredit kursus yang telah diambil oleh pelajar dalam sesuatu program terdahulu kepada program pengajian semasa yang sedang diikuti. Proses ini membolehkan kredit yang diperolehi bagi kursus tersebut dikira sebagai sebahagian daripada keperluan jumlah kredit untuk bergraduat bagi program pengajian semasa. Pada asasnya, kursus yang boleh dipindahkan kredit adalah kursus yang setara dengan kursus di program pengajian yang sedang diikuti di Universiti.

**“Pindah Kredit dengan Gred”** ertinya pemindahan kredit kursus secara mendatar (*horizontal*) bagi pelajar yang masih di dalam pengajian, pada tahap kelayakan yang sama dengan program pengajian semasa yang sedang diikuti oleh pelajar di Universiti.

**“Pindah Kredit Tanpa Gred (juga dikenali sebagai Pengecualian Kredit)”** ertinya pemindahan kredit kursus secara menegak (*vertical*) atau mendatar (*horizontal*) bagi pelajar yang telah tamat pengajian atau telah mencapai tahap kompetensi dalam kursus berkenaan kepada program pengajian semasa yang sedang diikuti oleh pelajar di Universiti.

**“program”** ertinya susunan kursus yang di struktur untuk suatu tempoh tertentu dan peringkat pembelajaran, bertujuan mencapai hasil pembelajaran yang telah ditentukan dan yang lazimnya menjurus kepada penganugerahan sesuatu kelayakan.

**“PPSH”** ertinya Pusat Pembelajaran Sepanjang Hayat.

**“semester”** ertinya jangka masa pengajian dalam Sesi Akademik yang telah ditetapkan oleh Universiti.

**“Semester Pendek”** ertinya jangkamasa pengajian 8 minggu yang dijalankan semasa cuti akhir Sesi Akademik.

**“Semester Lazim”** ertinya jangka masa pengajian 18 minggu yang ditetapkan oleh Universiti.

**“Senat”** ertinya badan akademik tertinggi bagi Universiti di bawah Perlembagaan Universiti Teknikal Malaysia Melaka.

“**Sesi Akademik**” ertinya jangka masa 12 bulan sebagaimana yang telah ditetapkan oleh Senat.

“**SPSH**” ertinya Sistem Pembelajaran Sepanjang Hayat untuk maklumat pelajar separa masa.

“**Status Kursus**” ertinya kod tambahan yang diberi semasa pendaftaran bagi menggambarkan kedudukan kursus.

“**tempoh maksimum pengajian**” ertinya bilangan maksimum semester yang dibenarkan bagi menamatkan sesuatu kursus.

“**Tempoh Pendaftaran Wajib Kursus**” ertinya tempoh masa pelajar wajib membuat pendaftaran kursus bagi setiap semester adalah pada seminggu sebelum dan seminggu selepas tarikh semester tersebut bermula.

“**Tempoh Pendaftaran Lewat Kursus**” ertinya tempoh masa di antara Minggu 2 hingga Minggu 3 semester untuk mendaftar kursus bagi pelajar yang tidak membuat pendaftaran kursus di dalam Tempoh Pendaftaran Wajib Kursus.

“**transkrip**” ertinya penyata rasmi yang mengandungi keputusan peperiksaan sepanjang tempoh pengajian pelajar yang dikeluarkan oleh Universiti.

“**Universiti**” ertinya Universiti Teknikal Malaysia Melaka.

## 1.2 INTERPRETASI

- (1) Bagi maksud Peraturan-Peraturan ini, perkataan yang membawa maksud tunggal juga akan merangkumi maksud majmuk dan sebaliknya.
- (2) Pada bila-bila masa Peraturan-Peraturan ini merujuk setiap hari dalam kalender, apa-apa angka atau nombor tersebut hendaklah dirujuk kepada hari-hari dalam kalender Gregorian.
- (3) Tajuk-tajuk dan tajuk-tajuk kecil dalam Peraturan-Peraturan ini dimasukkan bertujuan untuk rujukan sahaja dan tidak boleh dibuat pertimbangan dalam mentafsirkan Peraturan-Peraturan ini.

- (4) Lampiran-lampiran yang dirujuk di dalam Peraturan-Peraturan ini (jika ada) hendaklah diambil, dianggap, dibaca dan ditafsirkan sebagai bahagian yang penting kepada Peraturan-Peraturan ini.
- (5) Bagi maksud Peraturan-Peraturan ini, perkataan yang merujuk mana-mana jenis jantina hendaklah termasuk semua jantina.

## **BAHAGIAN II**

### **2. SESI AKADEMIK**

- (1) Sesi Akademik Universiti mengandungi dua (2) Semester Lazim (Semester I dan Semester II) dan satu (1) Semester Pendek (Semester III). Setiap Semester Lazim mengandungi empat belas (14) minggu perkuliahan, manakala Semester Pendek mengandungi tujuh (7) minggu perkuliahan.
- (2) Sesi Akademik dibahagikan seperti dalam Jadual 1.

**Jadual 1: Sesi Akademik Program Sarjana Muda dan Diploma**

<b>SEMESTER I</b>	<b>TEMPOH</b>
Perkuliahian	7 minggu
Cuti Pertengahan Semester	1 minggu
Perkuliahian	7 minggu
Minggu Ulangkaji	1 minggu
Peperiksaan Akhir	2 minggu
<b>Jumlah</b>	<b>18 minggu</b>
Cuti Antara Semester	3 minggu
<b>SEMESTER II</b>	<b>TEMPOH</b>
Perkuliahian	7 minggu
Cuti Pertengahan Semester	1 minggu
Perkuliahian	7 minggu
Minggu Ulangkaji	1 minggu
Peperiksaan Akhir	2 minggu
<b>Jumlah</b>	<b>18 minggu</b>
Cuti Antara Semester	1 minggu
<b>SEMESTER PENDEK</b>	<b>TEMPOH</b>
Perkuliahian	7 minggu
Peperiksaan Akhir	1 minggu
<b>Jumlah</b>	<b>8 minggu</b>
Cuti Akhir Semester	4 minggu
<b>JUMLAH</b>	<b>52 minggu</b>

### **BAHAGIAN III**

#### **3. PENDAFTARAN PROGRAM**

- (1) Semua calon pelajar dimestikan membuat pendaftaran program yang ditawarkan pada tarikh yang ditetapkan oleh Universiti.
- (2) Bagi calon pelajar yang tidak membuat pendaftaran program pada tarikh yang ditetapkan tanpa sebab-sebab yang boleh diterima oleh Universiti, tawaran program kepadanya terbatal.
- (3) Pendaftaran program hendaklah dilakukan pada setiap semester. Walau bagaimanapun, pendaftaran program bagi Pelajar Kanan dibuat secara automatik oleh pentadbiran Universiti berdasarkan kepada keputusan peperiksaan semester sebelumnya.
- (4) Pelajar Kanan yang telah terputus pengajian disebabkan penangguhan pengajian, penggantungan pengajian dan sebagainya hendaklah membuat pendaftaran program semula.
- (5) Pelajar tidak dibenarkan menukar program pengajiannya.

## **BAHAGIAN IV**

### **4. PENDAFTARAN KURSUS**

- (1) Semua pelajar diwajibkan mendaftar setiap kursus yang diambil pada setiap semester.
- (2) Semua pelajar mesti mendaftar kursus dengan kod yang betul.
- (3) Pelajar hanya boleh mendaftar mana-mana kursus yang telah ditetapkan dan ditawarkan oleh Fakulti.
- (4) Pelajar dibenarkan untuk mendaftar apa apa kursus di luar kurikulum program semasa sebagai Kursus Audit dengan kelulusan Dekan. Sekiranya Kursus Audit yang diambil melibatkan Fakulti lain, kelulusan kedua-dua Dekan Fakulti terlibat perlu diperolehi.
- (5) Pendaftaran wajib kursus bagi setiap semester adalah pada seminggu sebelum dan seminggu selepas tarikh semester tersebut bermula.
- (6) Pelajar yang tidak membuat pendaftaran kursus dalam Tempoh Pendaftaran Wajib yang ditetapkan mestilah mendaftar kursus di dalam Tempoh Pendaftaran Lewat Kursus iaitu minggu kedua (2) hingga ketiga (3) semester dan berdenda.
- (7) Pelajar yang masih gagal untuk mendaftar di dalam Tempoh Pendaftaran Lewat Kursus akan diberhentikan dari pengajian, kecuali atas sebab-sebab yang dapat diterima oleh Universiti dan akan dikenakan denda yang ditetapkan oleh Universiti.
- (8) Bagi pelajar yang mendapat keputusan KS atau gagal kursus pra-syarat, pendaftaran kursus terdahulu adalah terbatal dan pelajar perlu membuat pendaftaran semula kursus di dalam Tempoh Pendaftaran Lewat Kursus.
- (9) Pelajar yang mendapat KS hendaklah mendaftar kursus dengan jumlah maksimum enam (6) kredit. Dalam keadaan tertentu, pelajar boleh mendaftar lebih daripada enam (6) kredit tertakluk kepada kelulusan khas Dekan.
- (10) Pelajar boleh menambah dan/atau menggugurkan kursus tertakluk kepada jumlah beban kredit yang dibenarkan bermula dari minggu kedua (2) hingga minggu ketiga (3) semester.
- (11) Bagi mendaftar kursus yang mempunyai pra-syarat, pelajar perlu lulus kursus yang dipra-syaratkan.

**(12) Tarik Diri Kursus**

- (a) Pelajar boleh menarik diri daripada mana-mana kursus yang telah didaftarkan dengan syarat baki jumlah kredit kursus yang berdaftar adalah tidak kurang daripada kredit minimum iaitu enam (6) kredit bagi Semester Lazim dan dua (2) kredit bagi Semester Pendek.
- (b) Permohonan untuk menarik diri kursus hendaklah dibuat oleh pelajar tidak lewat daripada hari bekerja terakhir di dalam minggu ketiga belas (13) bagi Semester Lazim.
- (c) Bagi Semester Pendek pelajar boleh memohon untuk menarik diri daripada kursus pada minggu kelima (5).

## **BAHAGIAN V**

### **5. SISTEM KREDIT**

- (1) Setiap kursus mempunyai nilai kredit tertentu yang diluluskan oleh Universiti iaitu ukuran kuantitatif yang melambangkan volum pembelajaran atau beban pembelajaran untuk mencapai hasil pembelajaran kursus tersebut.
- (2) Beban pembelajaran adalah ukuran kuantitatif semua aktiviti pembelajaran yang diperlukan untuk mencapai satu set hasil pembelajaran. Aktiviti ini termasuklah kuliah, tutorial, seminar, praktikal, pembelajaran kendiri, pencarian maklumat, kajian, kerja lapangan serta persediaan dan menduduki peperiksaan.
- (3) Bagi tujuan pengiraan jam pembelajaran pelajar, satu (1) jam kredit dinilai sebagai 40 jam pembelajaran nosional.
- (4) **Beban Kredit Setiap Semester**
  - (a) Pelajar hendaklah mendaftar tidak kurang daripada jumlah kredit minimum, iaitu enam (6) kredit dalam sesuatu Semester Lazim dan dua (2) kredit Semester Pendek kecuali semester akhir pelajar. Pelajar yang ingin mengambil kurang daripada kredit minimum hendaklah mendapat kelulusan Dekan fakulti.
  - (b) Pelajar yang ingin mengambil lebih daripada dua belas (12) kredit bagi Semester Lazim hendaklah mendapat kelulusan Dekan.
  - (c) Pelajar tidak dibenarkan mengambil lebih daripada enam (6) kredit dalam sesuatu Semester Pendek.
  - (d) Pelajar yang menjalani Latihan Industri dibenarkan mengambil subjek Ulang Kursus (UM)/Ulang Gred (UG) sahaja dengan mendapat kebenaran Dekan tertakluk kepada maksimum tiga (3) kredit.
- (5) **Pindah kredit**
  - (a) Pelajar boleh memohon untuk mendapatkan Pindah Kredit jika telah lulus kursus yang sama atau setara atau mempunyai pengalaman setara yang diiktiraf oleh Senat. Terdapat dua (2) kategori Pindah Kredit iaitu Pindah Kredit Dengan Gred dan Pindah Kredit Tanpa Gred (juga dikenali sebagai Pengecualian Kredit).

- (b) **Pindah Kredit Dengan Gred dan Pindah Kredit Tanpa Gred** hendaklah berasaskan kepada kesetaraan kursus yang diperolehi menerusi pemetaan kursus (*course to course mapping*). Fakulti boleh memberikan pertimbangan untuk Pindah Kredit berdasarkan kepada syarat - syarat berikut:
- (i) Pelajar telah lulus kursus dengan mendapat sekurang-kurangnya gred C;
  - (ii) Nilai kredit kursus yang telah lulus sama dengan nilai kredit kursus bagi program semasa yang diikuti di Universiti;
  - (iii) Kandungan kursus yang telah lulus setara sekurang-kurang 80% dengan kandungan kursus program yang diikuti di Universiti; dan
  - (iv) Kursus yang dipohon Pindah Kredit hendaklah daripada program yang telah mendapat akreditasi/pengiktirafan dari badan yang berautoriti di negara berkenaan.
- (c) Bagi semua program Ijazah Sarjana Muda Kejuruteraan, Teknologi Kejuruteraan dan Diploma Kejuruteraan, jumlah **Pindah Kredit Dengan Gred** yang dibenarkan hendaklah tidak melebihi 50% daripada jumlah kredit untuk bergraduat. Tertakluk kepada syarat pemastautin, tiada had peratus maksimum Pindah Kredit Dengan Gred ditetapkan bagi lain-lain program.
- (d) Bagi semua program, jumlah **Pindah Kredit Tanpa Gred** (juga dikenali sebagai Pengecualian Kredit) **daripada peringkat kelayakan yang lebih rendah kepada peringkat kelayakan yang lebih tinggi** yang dibenarkan hendaklah tidak melebihi 30% daripada jumlah keseluruhan kredit untuk bergraduat bagi program tersebut.
- (e) Bagi semua program Ijazah Sarjana Muda Kejuruteraan, Teknologi Kejuruteraan dan Diploma Kejuruteraan, jumlah Pindah Kredit Tanpa Gred (juga dikenali sebagai Pengecualian Kredit) di antara program **pada peringkat kelayakan yang sama** hendaklah tidak melebihi 50% daripada jumlah keseluruhan kredit untuk bergraduat bagi program tersebut. Walau bagaimanapun dan tertakluk kepada syarat pemastautin, tiada had peratus maksimum Pindah Kredit Tanpa Gred (juga dikenali sebagai Pengecualian Kredit) ditetapkan bagi lain-lain program.

- (f) Bagi semua program Ijazah Sarjana Muda Kejuruteraan/Teknologi Kejuruteraan dan Diploma Kejuruteraan, gabungan jumlah Pindah Kredit Dengan Gred dan jumlah Pindah Kredit Tanpa Gred (juga dikenali sebagai Pengecualian Kredit) yang dibenarkan hendaklah tidak melebihi 50% daripada jumlah keseluruhan kredit untuk bergraduat. Tertakluk kepada syarat pemastautin, tiada had peratus maksimum ditetapkan bagi lain-lain program.
  - (g) Pindah Kredit Tanpa Gred (juga dikenali sebagai Pengecualian Kredit) sehingga maksimum 30% daripada jumlah kredit untuk bergraduat boleh diberikan berdasarkan APEL(C) atau bagi kursus yang telah diikuti menerusi platform MC, MOOC, dan lulus Ujian Kompetensi MOOC Universiti, tertakluk kepada syarat pemastautin minimum di Universiti iaitu satu (1) tahun bagi program Ijazah Sarjana Muda dan satu (1) semester bagi program Diploma. Pemindahan kredit ini merupakan tambahan kepada had Pindah Kredit Tanpa Gred yang dinyatakan pada perenggan (d) dan (e).
  - (h) Pelajar baharu boleh memohon kepada Fakulti untuk mendapatkan Pindah Kredit di dalam tempoh satu (1) minggu selepas pendaftaran semester pertama pelajar.
  - (i) Pelajar kanan yang telah lulus Ujian Kompetensi MOOC Universiti boleh memohon Pindah Kredit Tanpa Gred (juga dikenali sebagai Pengecualian Kredit) kepada Fakulti di dalam minggu pertama semester.
- (6) Kiraan Kredit Kursus Gagal**
- (a) Pelajar yang gagal dalam mana-mana kursus termasuk kursus berstatus Hadir Wajib (HW) hendaklah mengulang kursus yang sama atau setara sehingga lulus. Bagi tujuan pengiraan CGPA, Kredit Kira dan Mata Nilai Gred terakhir kursus yang diulang akan diambil kira dan kredit kira serta mata nilai yang asal dimansuhkan.
  - (b) Pelajar yang gagal dalam Kursus Elektif tidak semestinya mengulang kursus yang sama. Bagi tujuan pengiraan CGPA, Kredit Kira dan Mata Nilai Gred Kursus Elektif baru hendaklah diambil kira dan Kredit Kira serta Mata Nilai Gred yang asal hendaklah dimansuhkan.

- (c) Pelajar yang gagal dalam kursus Bahasa Ketiga atau Ko-kurikulum dibenarkan mengulang kursus yang lain di dalam pilihan Bahasa Ketiga dan Ko-kurikulum. Bagi tujuan pengiraan CGPA, Kredit Kira dan Mata Nilai Gred kursus baru akan diambil kira dan Kredit Kira serta Mata Nilai Gred yang asal dimansuhkan.
- (d) Pelajar yang ingin mengambil mana-mana kursus seperti yang dinyatakan dalam Peraturan 6 (a), (b) atau (c) akan dikenakan bayaran sebagaimana pendaftaran kursus secara lazim.

**(7) Kiraan Kredit Kursus Audit**

- (a) Status Hadir Wajib (HW) diberikan kepada Kursus Audit. Kredit kursus tidak akan diambil kira dalam pengiraan GPA dan CGPA tetapi diambil kira di dalam Kredit Dapat.
- (b) Pelajar yang gagal Kursus Audit tidak dibenarkan untuk mengulang kursus.

**(8) Tempoh Maksimum Pengajian**

- (a) Tempoh maksimum pengajian adalah seperti dalam Jadual 2.

**Jadual 2: Tempoh Maksimum Pengajian**

Program	Tempoh Maksimum Semester	
	Semester Lazim	Semester Pendek
Ijazah Sarjana Muda Kejuruteraan	20	10
Ijazah Sarjana Muda Sains Komputer / Teknologi Maklumat	20	10
Ijazah Sarjana Muda Pengurusan Teknologi	20	10
Ijazah Sarjana Muda Teknousahawanan	20	10
Ijazah Sarjana Muda Teknologi Kejuruteraan	20	10
Diploma	16	8

- (b) Jumlah kredit yang diperlukan untuk lulus sesuatu program ditetapkan oleh Fakulti dengan kelulusan Universiti.

**(9) Semester Pendek**

- (a) “Semester Pendek” merupakan tempoh yang ditetapkan oleh Universiti bagi sesuatu Sesi Akademik. Setiap semester mengandungi sekurang-kurangnya lapan (8) minggu yang terdiri dari minggu perkuliahan dan minggu peperiksaan akhir.
- (b) Penawaran kursus pada semester ini adalah berdasarkan kepada kursus-kursus yang ditetapkan oleh Fakulti kecuali Projek Sarjana Muda (PSM), *Integrated Design Project* (IDP), Projek Diploma dan tertakluk kepada kelulusan Universiti.
- (c) Tempoh semester ini merangkumi minggu makmal, perkuliahan, dan peperiksaan akhir sahaja.
- (d) Tiada cuti pertengahan semester dan minggu ulangkaji sepanjang semester ini.
- (d) Jumlah kredit maksimum yang boleh didaftarkan oleh pelajar ialah enam (6) kredit sahaja.
- (f) Prosedur pendaftaran kursus adalah sama seperti Semester Lazim.
- (g) Gred kursus Semester Pendek adalah sama seperti Semester Lazim.
- (h) Prosedur mengumumkan keputusan peperiksaan dan rayuan keputusan sama seperti Semester Lazim.
- (i) Kadar yuran pengajian yang dikenakan pada semester ini adalah seperti yang dinyatakan dalam Jadual Yuran Program Separa Masa UTeM.

## BAHAGIAN VI

### 6. SISTEM GRED

- (1) Pencapaian pelajar dalam sesuatu kursus dinyatakan dengan gred. Hubungan antara markah, Gred dan Mata Nilai adalah seperti dalam Jadual 3.

**Jadual 3 : Hubungan Antara Markah, Gred dan Mata Nilai**

Markah	Gred	Mata Nilai	Pencapaian
80 - 100	A	4.0	Cemerlang
75 - 79	A-	3.7	Cemerlang
70 - 74	B+	3.3	Kepujian
65 - 69	B	3.0	Kepujian
60 - 64	B-	2.7	Lulus
55 - 59	C+	2.3	Lulus
50 - 54	C	2.0	Lulus
47 - 49	C-	1.7	Lulus Bersyarat
44 - 46	D+	1.3	Lulus Bersyarat
40 - 43	D	1.0	Lulus Bersyarat
00 - 39	E	0.0	Gagal

- (2) Selain daripada gred di atas, gred berikut juga digunakan:-

HL (Hadir Lulus)	Gred lulus bagi kursus yang didaftarkan sebagai Hadir Wajib (HW).
HG (Hadir Gagal)	Gred gagal bagi kursus yang didaftarkan sebagai Hadir Wajib (HW).
HS (Hadir Sahaja)	Gred bagi kursus yang didaftarkan sebagai Hadir Sahaja (HS).

- (3) Gred lulus untuk kursus adalah D. Bagi kursus yang mendapat gred D hingga B-, pelajar dibenarkan membaiki gred dengan mengulangi kursus tersebut tertakluk kepada Peraturan 8 (2) (a).

## **BAHAGIAN VII**

### **7. PENILAIAN**

#### **(1) Skim Penilaian**

- (a) Penilaian setiap kursus termasuk Latihan Industri dibuat dalam bentuk sumatif dan formatif secara berkala dan berterusan mengikut prosedur yang ditetapkan oleh Universiti.
- (b) Bagi kursus kejuruteraan, wajaran Kerja Kursus hendaklah tidak lebih daripada 40% manakala wajaran Peperiksaan Akhir hendaklah tidak kurang daripada 60%.
- (c) Bagi kursus teknologi kejuruteraan dan selain kursus kejuruteraan, wajaran Kerja Kursus hendaklah tidak kurang daripada 60% manakala wajaran Peperiksaan Akhir hendaklah tidak lebih daripada 40%.
- (d) Penilaian mengikut wajaran selain daripada yang dinyatakan di Peraturan 7(1) (b) dan (c) juga boleh dilakukan dengan kelulusan Senat.

#### **(2) Syarat Menduduki Penilaian**

- (a) Pelajar hendaklah menghadiri sepenuhnya masa pertemuan dan/atau aktiviti berkaitan yang ditetapkan bagi sesuatu kursus termasuk Latihan Industri.
- (b) Pelajar yang kehadirannya kurang daripada **80%** dalam:
  - (i) bentuk masa pertemuan;
  - (ii) penglibatan dalam aktiviti berkaitan yang ditetapkan dalam sesuatu kursus; atau
  - (iii) bentuk masa pertemuan dan penglibatan dalam aktiviti berkaitan yang ditetapkan dalam sesuatu kursus; hendaklah dihalang daripada mengikuti sebarang bentuk masa pertemuan seterusnya, penilaian kerja kursus dan peperiksaan akhir.

#### **(3) Peperiksaan Akhir**

- (a) Peperiksaan akhir hendaklah dijalankan dalam tempoh dan mengikut prosedur yang ditetapkan oleh Universiti.
- (b) Semua pelajar berdaftar adalah **diwajibkan** menduduki peperiksaan akhir yang ditetapkan bagi sesuatu kursus tertentu yang telah ditetapkan oleh

Fakulti. Mana-mana pelajar yang tidak menghadiri peperiksaan akhir hendaklah diberi markah sifar (0) bagi keseluruhan kursus tersebut.

**(4) Peperiksaan Khas**

- (a) Pelajar perlu memohon untuk menduduki Peperiksaan Khas tertakluk kepada kelulusan Senat.
- (b) Tertakluk kepada kelulusan Senat, Peperiksaan Khas boleh diadakan bagi kes-kes seperti berikut dalam tempoh dan mengikut prosedur yang ditetapkan oleh Universiti:
  - (i) Pelajar yang tidak dapat menduduki Peperiksaan Akhir kerana masalah kesihatan dan diperakukan oleh Pegawai Perubatan.
  - (ii) Pelajar yang tidak dapat menduduki Peperiksaan Akhir atas alasan tidak mendapat pelepasan majikan. Bagi tujuan ini, surat rasmi majikan hendaklah disertakan.
  - (iii) Pelajar yang tidak dapat menduduki Peperiksaan Akhir kerana ditimpa musibah seperti kemalangan, bencana alam atau kematian ibu bapa serta waris terdekat atau atas kepentingan negara. Pelajar dikehendaki untuk mengemukakan permohonan beserta dengan bukti yang telah diperakui oleh Fakulti kepada PPSH.
  - (iv) Pelajar semester akhir yang lulus dengan KB, tetapi gagal dalam satu kursus daripada dua (2) semester terakhir dan pelajar belum menghabiskan tempoh maksimum pengajian.
  - (v) Pelajar semester akhir yang lulus dengan KB, tetapi gagal dalam satu kursus ulangan (UM) dengan syarat kursus tersebut telah diambil tiap-tiap kali ianya ditawarkan.
  - (vi) Alasan ketidakhadiran Peperiksaan Akhir selain daripada di atas tidak boleh dipertimbangkan kecuali dengan kelulusan Senat.
- (c) Peperiksaan Khas tidak boleh diadakan bagi kes-kes berikut:
  - (i) Kursus yang tidak ada Peperiksaan Akhir.
  - (ii) Pelajar yang tidak menduduki Peperiksaan Akhir tanpa sebab yang boleh diterima oleh Universiti.

**(5) Pengumuman Keputusan Gred Kursus**

- (a) Fakulti akan mempamerkan keputusan akhir gred kursus dalam tempoh yang ditetapkan oleh Universiti.

**(6) Rayuan Keputusan Gred Kursus**

- (a) Pelajar boleh membuat rayuan penyemakan keputusan gred kursus bagi mana-mana kursus kepada Fakulti dalam tempoh dan mengikut prosedur yang ditetapkan.

## **BAHAGIAN VIII**

### **8. KEDUDUKAN AKADEMIK**

#### **(1) Status Kedudukan Akademik**

- (a) Pencapaian akademik pelajar dinilai dengan menggunakan GPA dan CGPA.
- (b) Kedudukan Akademik pelajar ditentukan di akhir setiap semester seperti di Jadual 4.

**Jadual 4: Kedudukan Akademik**

Kedudukan Akademik	CGPA
Kedudukan Baik (KB)	CGPA $\geq$ 2.00
Kedudukan Bersyarat (KS)	CGPA $<$ 2.00

- (c) Pelajar yang mendapat keputusan CGPA  $<$  2.00 akan mendapat kedudukan akademik KS dan boleh meneruskan pengajian. Walaubagaimanapun, ianya adalah tertakluk kepada syarat pendaftaran kursus bagi pelajar KS.
- (d) Pengiraan GPA dan status kedudukan akademik pelajar untuk Semester Pendek ditentukan sama seperti Semester Lazim.
- (e) Pelajar yang mendapat KS sembilan (9) kali berturut-turut termasuk Semester Pendek akan diberikan KG.
- (f) Pelajar yang mendapat KG akan diberhentikan dari pengajian.

#### **(2) Membaiki Kedudukan Akademik**

- (a) Pelajar dibenarkan untuk membaiki gred kursus sepanjang tempoh pengajian dengan syarat-syarat:
  - (i) Mendapat keputusan gred D hingga B-.
  - (ii) Membaiki gred kursus yang sama atau setara jika Fakulti ada menawarkan kursus tersebut.
  - (iii) kursus PSM, IDP dan Projek Diploma tidak dibenarkan untuk dibaiki gred.
- (b) Gred yang terbaik di antara gred asal dan terkini akan diambil kira dalam pengiraan GPA dan CGPA.

- (c) Pelajar semester akhir yang telah memenuhi syarat jumlah Kredit Dapat tetapi mendapat KS akan diberi peluang untuk membaiki Kedudukan Akademiknya dengan syarat-syarat berikut:
    - (i) Tempoh maksimum pengajian pelajar belum tamat.
    - (ii) Mengambil semula beberapa kursus dengan persetujuan Fakulti.
    - (iii) Pelajar yang gagal membaiki Kedudukan Akademiknya dengan memperolehi status KB akan diberikan status KG dan diberhentikan.
- (3) **Pengumuman Keputusan Kedudukan Akademik**
- (a) Keputusan Kedudukan Akademik akan diumumkan kepada pelajar setelah mendapat kelulusan Senat.
- (4) **Status Sesi Akademik Pelajar**
- (a) Status Sesi Akademik pelajar ditentukan berdasarkan jumlah Kredit Dapat semasa mengikut formula  $KD \geq JKL - 6$  di mana JKL ialah jumlah Kredit Lazim yang ditentukan oleh Fakulti untuk Sesi Akademik sebelumnya.

## **BAHAGIAN IX**

### **9. SENARAI DEKAN**

- (a) Pelajar yang mendapat  $GPA \geq 3.50$  pada **mana-mana semester** akan dimasukkan dalam Senarai Dekan dengan syarat pelajar telah mendaftar kursus sekurang-kurangnya **Iapan (8) kredit** bagi semester berkenaan tidak termasuk kursus berstatus hadir sahaja (HS) dan hadir wajib (HW) pada semester berkenaan. Pelajar yang mengikuti Latihan Industri tidak layak menerima Senarai Dekan.
- (b) Catatan Senarai Dekan akan dinyatakan di dalam transkrip dan Slip Keputusan Peperiksaan.

## **BAHAGIAN X**

### **10. SYARAT PENGANUGERAHAN IJAZAH SARJANA MUDA ATAU DIPLOMA**

- (1) Pelajar layak dianugerahkan setelah syarat-syarat berikut dipenuhi:
  - (a) Pelajar mesti mendapat KB pada semester akhir.
  - (b) Pelajar mesti lulus dalam semua kursus yang disyaratkan dalam kurikulum.
  - (c) Syarat-syarat lain yang ditetapkan oleh Universiti dari masa ke semasa.
- (2) Kedudukan Baik Anugerah (KBA) akan diberikan kepada pelajar yang telah memenuhi syarat di Peraturan 10 (1) di atas. Pelajar perlu memohon untuk mendapatkan status KBA pada semester akhir tersebut.
- (3) Kedudukan Baik Tamat Tempoh (KBTT) akan diberikan kepada pelajar yang tidak memenuhi syarat di Peraturan 10 (1) di atas kerana telah menggunakan tempoh maksimum pengajian.
- (4) Kedudukan Baik Tanpa MUET (KBTM) akan diberikan kepada pelajar warganegara Malaysia program Ijazah Sarjana Muda tahun akhir yang tidak memenuhi syarat di Peraturan 10 (1) di atas kerana belum mendapat keputusan Band yang ditetapkan oleh Universiti di dalam peperiksaan *Malaysian University English Test (MUET)*.
- (5) Kedudukan Baik Tanpa Bahasa Melayu (KBTB) akan diberikan kepada pelajar yang gagal memenuhi syarat Bahasa Melayu/Bahasa Malaysia dan Sejarah (SPM 2013 dan ke atas) seperimana yang telah ditetapkan oleh universiti.
- (6) Mana-mana pelajar yang tidak memenuhi syarat di Peraturan 10 (1) di atas boleh dianugerahkan Ijazah Sarjana Muda atau Diploma dengan kelulusan khas Universiti.
- (7) Pelajar yang telah tamat tempoh pengajian tetapi tidak memenuhi syarat penganugerahan di atas akan diberikan status Kedudukan Gagal (KG) dan diberhentikan daripada pengajian.

## **BAHAGIAN XI**

### **11. PENANGGUHAN PENGAJIAN**

- (1) Pelajar yang mendapat Sijil Cuti Sakit atau surat sokongan dan pengesahan status kesihatan daripada Pegawai Perubatan Universiti atau Hospital/Klinik Kerajaan boleh memohon untuk penangguhan pengajian. Penangguhan ini tidak diambil kira dalam bilangan semester yang telah digunakan.
- (2) Pelajar juga boleh memohon penangguhan atas alasan selain daripada sebab-sebab kesihatan. Permohonan ini boleh dibuat sehingga minggu ketiga belas (13) bagi Semester Lazim dan minggu kelima (5) bagi Semester Pendek. Penangguhan ini akan diambil kira dalam pengiraan bilangan semester yang telah digunakan. Penangguhan ini adalah untuk maksimum empat (4) Semester Lazim dan dua (2) Semester Pendek sahaja.
- (3) Walau bagaimanapun, bagi penangguhan pengajian untuk pelajar yang terlibat dengan Mod Industri atau “Gap Year”, Senat boleh meluluskan tempoh penangguhan tersebut dan ianya tidak akan diambil kira dalam pengiraan bilangan semester yang telah digunakan. Penangguhan ini adalah untuk maksimum dua (2) Semester Lazim dan satu (1) Semester Pendek sahaja.
- (4) Sekiranya pelajar memerlukan lebih daripada tempoh penangguhan maksimum, pelajar hendaklah mendapat kelulusan Universiti bagi menentukan sama ada pelajar dibenarkan untuk meneruskan pengajiannya atau diberhentikan.
- (5) Bagi pelajar yang ditangguhkan pengajiannya oleh Fakulti disebabkan oleh tiada penawaran kursus atau kes tertentu, tempoh penangguhan tersebut tidak akan diambil kira sebagai semester yang telah digunakan.
- (6) Bagi pelajar yang ditangguhkan pengajiannya oleh Universiti atas lain-lain sebab, tempoh penangguhan tersebut akan diambil kira sebagai semester yang telah digunakan.

## **BAHAGIAN XII**

### **12. PENGGANTUNGAN PENGAJIAN**

- (1) Semasa mengikuti pengajian, pelajar boleh digantung pengajian mereka atas sebab-sebab berikut:
  - (i) Tindakan tatatertib.
  - (ii) Gagal menjelaskan yuran pengajian.
- (2) Tempoh penggantungan pengajian akan dianggap sebagai telah digunakan bagi tujuan pengiraan tempoh pengajian di Universiti ini.
- (3) Pelajar yang sedang digantung pengajian tidak dibenarkan menggunakan sebarang kemudahan dan perkhidmatan Universiti.

### **BAHAGIAN XIII**

#### **13. PERMOHONAN BERHENTI DARIPADA PENGAJIAN**

- (1) Pelajar tidak dibenarkan berhenti dari pengajian kecuali dengan kelulusan Universiti.
- (2) Pelajar tidak dibenarkan meninggalkan pengajiannya sebelum keputusan mengenai permohonannya diputuskan oleh pihak Universiti.
- (3) Pelajar bertanggungjawab atas apa jua implikasi daripada tindakan ini. Universiti juga berhak menuntut apa jua hutang yang masih belum dijelaskan oleh pelajar, penjamin atau waris pelajar.

## **BAHAGIAN XIV**

### **14. PENYELEWENGAN AKADEMIK**

- (1) Penyelewengan akademik merupakan kesalahan yang boleh dikenakan tindakan tata tertib di bawah Kaedah-Kaedah Universiti Teknikal Malaysia Melaka (Tata tertib Pelajar-Pelajar) 2009.

## **BAHAGIAN XV**

### **15. TATATERTIB PEPERIKSAAN AKHIR SEMESTER**

- (1) Pelajar adalah dinasihatkan supaya berada di luar Dewan Peperiksaan tidak lewat daripada lima belas (15) minit sebelum peperiksaan bermula.
- (2) Pelajar dikehendaki menunggu di luar Dewan Peperiksaan sehingga diberi kebenaran masuk oleh Pengawas yang bertugas. Pelajar boleh dibenarkan masuk ke Dewan Peperiksaan lima belas (15) minit sebelum waktu peperiksaan bermula. Apabila kebenaran masuk telah diberikan, pelajar hendaklah masuk dengan tertib melalui pintu yang ditetapkan.
- (3) Pelajar adalah dimestikan memasuki Dewan Peperiksaan yang telah ditetapkan sebagaimana yang tercatat dalam Jadual Waktu Peperiksaan.
- (4) Pelajar tidak dibenarkan masuk ke Dewan Peperiksaan selepas tiga puluh (30) minit peperiksaan dimulakan. Pelajar yang datang selepas tiga puluh (30) minit dari waktu sesuatu peperiksaan dimulakan tidak boleh menduduki peperiksaan tersebut kecuali dengan alasan yang boleh diterima oleh Ketua Pengawas.
- (5) Pelajar yang lewat hadir tetapi tidak melebihi tiga puluh (30) minit daripada waktu peperiksaan dimulakan adalah dibenarkan mengambil peperiksaan, tetapi waktu tamat peperiksaan bagi kursus tersebut adalah sama dengan pelajar lain.
- (6) Pelajar tidak boleh meninggalkan Dewan Peperiksaan dalam masa tiga puluh (30) minit selepas peperiksaan bermula dan juga dalam masa lima belas (15) minit sebelum peperiksaan berakhir. Pelajar yang ingin keluar sebentar daripada Dewan Peperiksaan hendaklah meminta kebenaran daripada Ketua Pengawas atau wakilnya. Pelajar juga perlu mengisi Buku Rekod Pelajar yang telah disediakan.
- (7) Pelajar hendaklah mendapatkan Slip Peperiksaan dua (2) minggu sebelum Peperiksaan Akhir bermula dengan mencetak Slip Peperiksaan tersebut melalui portal masing-masing.
- (8) Semua pelajar dikehendaki membawa Slip Peperiksaan bersama kad matrik pelajar ke Dewan Peperiksaan. Slip Peperiksaan dan kad matrik pelajar hendaklah diletakkan di sudut kanan meja peperiksaan untuk diperiksa oleh Pengawas. Pelajar tidak dibenarkan menduduki peperiksaan sekiranya tidak berbuat demikian.

- (9) Pelajar yang tidak mempunyai Slip Peperiksaan tidak dibenarkan mengambil peperiksaan melainkan dengan kebenaran bertulis daripada Penyelia Peperiksaan atau wakilnya.
- (10) Pelajar tidak dibenarkan sama sekali membawa apa-apa buku, kertas, suratan, gambar, nota, sebarang alat yang di dalam atau di atasnya terdapat catatan bertulis, ‘programmable calculator’, telefon mudah alih atau sebarang alat kecuali yang dibenarkan oleh Pengawas ke dalam atau keluar dari sesuatu Dewan Peperiksaan atau menerima apa-apa buku, kertas, suratan, gambar, nota, sebarang alat yang di dalam atau di atasnya terdapat catatan bertulis, ‘programmable calculator’, telefon mudah alih atau sebarang alat dari mana-mana orang lain semasa di dalam Dewan Peperiksaan kecuali seseorang pelajar semasa ia berada di dalam Dewan Peperiksaan itu menerima daripada Pengawas apa-apa buku, kertas, dokumen/gambar atau lain-lain alat yang dibenarkan oleh Naib Canselor atas syor Pemeriksa atau Fakulti.
- (11) Alat keperluan yang dipinjamkan kepada pelajar hendaklah dikembalikan kepada Pengawas di akhir peperiksaan.
- (12) Dalam masa lima (5) minit sebelum peperiksaan dimulakan, pelajar diminta:
  - (a) Memastikan mendapat kertas soalan yang betul dan bilangan muka surat yang mencukupi.
  - (b) Mengisi Borang Kehadiran dan maklumat yang dikehendaki di muka hadapan buku/kertas jawapan peperiksaan.
- (13) Pelajar hendaklah membaca dengan teliti dan mematuhi arahan yang tercetak pada kulit buku jawapan.
- (14) Pelajar hendaklah menulis nombor kad pengenalan, nombor Matrik, kod kursus dan kursus di tiap-tiap buku jawapan/kertas jawapan dan lampiran yang digunakan. Pelajar juga hendaklah menandakan nombor soalan yang dijawab pada buku jawapan.
- (15) Pelajar sama sekali tidak dibenarkan membaca dan membuka kertas soalan sebelum menerima arahan daripada Ketua Pengawas.
- (16) Semua jawapan hendaklah ditulis menggunakan pen kecuali gambarajah dan lakaran graf.

- (17) Sekiranya seorang pelajar mendapati dia telah diberikan kertas soalan yang salah, ia hendaklah dengan serta merta memberitahu Pengawas Peperiksaan yang bertugas.
- (18) Semua kerja peperiksaan termasuk kerja percubaaan (*rough work*) mestи dibuat dalam buku jawapan. Helaian buku jawapan tidak boleh dikoyakkan.
- (19) Buku jawapan dan/atau kertas jawapan yang telah digunakan tetapi telah rosak atau kosong tidak dibenarkan dibawa keluar dari Dewan Peperiksaan.
- (20) Pelajar tidak boleh merujuk dan menggunakan sebarang bahan rujukan yang dilarang di dalam atau di luar bilik peperiksaan bagi keperluan peperiksaan semasa peperiksaan sedang berjalan.
- (21) Pelajar tidak boleh mula menjawab soalan peperiksaan sebelum waktu yang ditetapkan atau meneruskan menjawab selepas waktu peperiksaan tamat.
- (22) Semasa berada di dalam Dewan Peperiksaan pelajar hendaklah mematuhi segala arahan Pengawas Peperiksaan.
- (23) Pelajar tidak dibenarkan berhubung dengan mana-mana pelajar lain dalam masa peperiksaan dengan apa-apa cara juga pun. Pelajar tidak boleh memberi atau menerima sebarang bantuan daripada pelajar atau pihak lain yang berkaitan dengan peperiksaan semasa peperiksaan kecuali yang dibenarkan oleh Pengawas.
- (24) Pelajar tidak dibenarkan sama sekali membawa makanan selain air di Dewan Peperiksaan.
- (25) Di akhir peperiksaan, pelajar hendaklah memastikan bahawa buku jawapan atau/ dan kertas jawapan peperiksaan disusun dan diikat dengan sempurna mengikut arahan.
- (26) Pelajar dikehendaki berada di tempat duduk masing-masing selepas tamat peperiksaan dan hanya dibenarkan keluar dari Dewan Peperiksaan setelah mendapat arahan berbuat demikian daripada Ketua Pengawas Peperiksaan.
- (27) Pelajar hendaklah masuk dan keluar dari Dewan Peperiksaan dalam keadaan tertib dan teratur.

## **BAHAGIAN XVI**

### **16. HUKUMAN**

- (1) Sekiranya pelajar didapati melakukan mana-mana penyelewengan akademik atau Tatatertib Peperiksaan Akhir Semester, setelah dibicara dan sabit kesalahannya, maka Senat boleh mengambil tindakan dari mana-mana satu, atau apa-apa kombinasi yang sesuai daripada hukuman-hukuman berikut:
  - (a) Memberi amaran bertulis kepada pelajar;
  - (b) Memberi markah sifar (0) kepada kerja kursus atau peperiksaan akhir bagi kursus berkenaan;
  - (c) Memberi markah sifar (0) bagi kursus yang berkenaan;
  - (d) Menggantung pengajian pelajar selama satu tempoh yang difikirkan patut oleh Senat;
  - (e) Memberi markah sifar (0) bagi kesemua kursus yang diambil di dalam semester yang terbabit; atau
  - (f) Memberi markah sifar (0) bagi keseluruhan kursus yang diambil pada semester yang terbabit dan diberhentikan dari pengajian.

## **BAHAGIAN XVII**

### **17. YURAN PENGAJIAN DAN LAIN-LAIN YURAN SERTA CAJ**

- (1) Universiti akan mengenakan bayaran Yuran Pengajian kepada semua pelajar program Ijazah Sarjana Muda atau Diploma pada setiap semester dan kemasukan pelajar. Di samping itu, Universiti juga berhak mengenakan lain-lain yuran serta caj mengikut kadar yang ditetapkan.
- (2) Pihak Universiti berkuasa penuh untuk meminda kadar Yuran Pengajian dan lain-lain yuran serta caj yang telah ditetapkan dari semasa ke semasa.
- (3) Yuran Pengajian ialah caj keseluruhan semester atau pengajian yang dikenakan ke atas pelajar dalam sesuatu semester pada satu kadar yang telah ditetapkan mengikut jadual kadar yuran.
  - (a) Yuran sekali sepanjang pengajian ialah:
    - (i) Yuran pendaftaran;
    - (ii) Yuran kad matrik;
    - (iii) Yuran hari haluan siswa; dan
    - (iv) Yuran alumni.
  - (b) Yuran berulang (setiap semester) ialah:
    - (i) Yuran pelajaran;  
(termasuk yuran pelajaran yang dikenakan mengikut jam kredit bagi pelajar semester, dan tidak termasuk lanjut tempoh);
    - (ii) Yuran perkhidmatan;
    - (iii) Yuran aktiviti dan khairat pelajar.
- (4) Mana-mana pelajar yang gagal menjelaskan Yuran Pengajian dan lain-lain yuran serta caj di dalam tempoh yang ditetapkan boleh dikenakan mana-mana satu atau mana-mana gabungan dua atau lebih hukuman yang sesuai oleh Pihak Berkuasa Universiti seperti berikut:
  - (a) Ditahan daripada membuat pendaftaran kursus.
  - (b) Ditahan slip peperiksaan.
  - (c) Ditahan keputusan peperiksaan.
  - (d) Digantung pengajian.
  - (e) Diberhentikan.

- (f) Ditahan daripada menghadiri konvokesyen.
  - (g) Ditahan sijil dan transkrip.
  - (h) Denda lewat.
- (5) Mana-mana pelajar yang menangguh pengajian atau berhenti pengajian atau diberhentikan pengajian dikehendaki:
- (a) menjelaskan semua Yuran Pengajian dan lain-lain yuran serta caj bagi semester yang telah dijalani; dan
  - (b) menjelaskan Yuran Pengajian dan lain-lain yuran serta caj bagi semester di mana pelajar menangguh pengajian atau berhenti pengajian atau diberhentikan pengajian. Tiada pengurangan kadar yuran yang dibenarkan.

## **BAHAGIAN XVIII**

### **18. PERUNTUKAN-PERUNTUKAN AM**

- (1) Sebarang panduan dan prosedur pelaksanaan selanjutnya boleh dibuat di bawah mana-mana peruntukan Peraturan Akademik ini. Semua panduan dan prosedur yang dibuat mestilah dipatuhi. Walau bagaimanapun, Senat boleh meminda dan mengecualikan mana-mana peruntukan Peraturan Akademik ini dan panduan serta prosedur pelaksanaan dari semasa ke semasa.
- (2) Pelajar dinasihatkan untuk sentiasa mendapatkan penerangan dan bimbingan daripada Penasihat Akademik bagi membantu pelajar merencanakan pembelajaran di Universiti.

**Disahkan oleh Senat Universiti Teknikal Malaysia Melaka**

Pada  
29 Mac 2017

Pindaan 2021

Pengerusi  
Senat Universiti Teknikal Malaysia Melaka

**PANDUAN SISTEM PERATURAN-PERATURAN AKADEMIK BAGI PROGRAM  
SARJANA MUDA DAN DIPLOMA SEPARA MASA UNIVERSITI TEKNIKAL  
MALAYSIA MELAKA**

**MUKADIMAH**

Dokumen ini menggariskan kaedah pelaksanaan dasar-dasar yang diluluskan oleh Senat untuk menjamin standard pendidikan dan pengijazahan program pengajian Sarjana Muda dan Diploma Separa Masa di Universiti Teknikal Malaysia Melaka (UTeM). Dokumen ini hendaklah dibaca bersama Peraturan Akademik bagi program Sarjana Muda dan Diploma Separa Masa UTeM dan ianya diterbitkan kepada semua pelajar, fakulti dan staf, yang semuanya bertanggungjawab untuk membaca dan mematuhi kaedah pelaksanaan dasar-dasar tersebut.

## **KANDUNGAN**

<b>BAHAGIAN</b>	<b>PERKARA</b>	<b>MUKA SURAT</b>
BAHAGIAN I	Sistem Akademik	1
BAHAGIAN II	Pendaftaran Program dan Kursus	5
BAHAGIAN III	Pengendalian Semester Pendek	21
BAHAGIAN IV	Sistem Kredit	23
BAHAGIAN V	Penilaian	33
BAHAGIAN VI	Sistem Gred	46
BAHAGIAN VII	Kedudukan Akademik	47
BAHAGIAN VIII	Penyelewengan Akademik	52
BAHAGIAN IX	Penganugerahan	53

## **BAHAGIAN I**

### **1. SISTEM AKADEMIK**

Universiti melaksanakan sistem akademik mengikut sistem semester. Sistem semester merupakan sistem yang digunakan secara meluas di Institusi Pengajian Tinggi tempatan. Panduan Sistem Peraturan Akademik ini menjelaskan pelaksanaan “Peraturan-Peraturan Akademik Bagi Program Ijazah Sarjana Muda dan Diploma Separa Masa Universiti Teknikal Malaysia Melaka”.

#### **(1) Sesi Akademik**

- (a) Sesi Akademik Universiti mengandungi dua (2) Semester Lazim (semester I dan semester II) dan satu (1) Semester Pendek (Semester III). Setiap Semester Lazim mengandungi 14 minggu Perkuliahan, 1 minggu Cuti Pertengahan Semester, 1 minggu Cuti Ulang Kaji dan 2 minggu Peperiksaan Akhir. Semester Pendek mengandungi 7 minggu Perkuliahan dan 1 minggu Peperiksaan Akhir.
- (b) Di samping dua Semester Lazim Universiti juga mempunyai Semester Pendek yang diadakan pada masa cuti akhir Sesi Akademik. Semester Pendek ini termasuk dalam pengiraan tempoh pengajian yang ditetapkan bagi sesuatu program.
- (c) Bagi program Sarjana Muda, Semester I lazimnya bermula pada bulan September setiap tahun dan Semester II bermula pada bulan Februari tahun berikutnya. Manakala Semester Pendek lazimnya bermula pada bulan Jun hingga Ogos.
- (d) Hari Bersama Pelajar Baharu Separa Masa diadakan lazimnya diadakan pada Hari Pendaftaran Pelajar sebelum bermulanya sesi perkuliahan Semester I atau Semester II.
- (e) Sesi Akademik adalah tertakluk kepada pindaan oleh Senat Universiti yang dimaklumkan menerusi Pekeliling Pentadbiran/Pekeliling Akademik/Kalendar Akademik semasa.
- (f) Sesi Akademik Universiti adalah seperti di Jadual 1.

Jadual 1: Sesi Akademik Program Sarjana Muda dan Diploma Separa Masa

<b>SEMESTER I</b>	<b>TEMPOH</b>
Perkuliahian	7 minggu
Cuti Pertengahan Semester	1 minggu
Perkuliahian	7 minggu
Minggu Ulangkaji	1 minggu
Peperiksaan Akhir	2 minggu
<b>Jumlah</b>	<b>18 minggu</b>
Cuti Antara Semester	3 minggu
<b>SEMESTER II</b>	<b>TEMPOH</b>
Perkuliahian	7 minggu
Cuti Pertengahan Semester	1 minggu
Perkuliahian	7 minggu
Minggu Ulangkaji	1 minggu
Peperiksaan Akhir	2 minggu
<b>Jumlah</b>	<b>18 minggu</b>
Cuti Antara Semester	1 minggu
<b>SEMESTER PENDEK</b>	<b>TEMPOH</b>
Perkuliahian	7 minggu
Peperiksaan Akhir	1 minggu
<b>Jumlah</b>	<b>8 minggu</b>
Cuti Akhir Semester	4 minggu
<b>JUMLAH</b>	<b>52 minggu</b>

## (2) Sistem Semester

- (a) Sistem semester merupakan satu sistem pembelajaran yang fleksibel. Tertakluk kepada Bahagian V, sub-peraturan 5(4) Peraturan Akademik mengenai beban kredit setiap semester, pelajar boleh merancang beban pembelajaran dan tempoh pengajian mengikut kemampuan dan latar belakang akademik masing-masing.

- (b) Pelajar boleh dianugerahkan Ijazah Sarjana Muda atau Diploma setelah memenuhi kredit untuk bergraduat dan menyempumakan syarat pengijazahan.

**(3) Hubung Kait Kursus Dalam Sesuatu Semester**

- (a) Pelajar perlu mengambil kursus mengikut kurikulum yang ditetapkan oleh Fakulti dan diluluskan oleh Senat.
- (b) Pelajar dikehendaki lulus dalam setiap kursus yang diambil.
- (c) Pelajar yang gagal dalam sesuatu kursus perlu mengulang semula kursus tersebut sehingga lulus dalam tempoh pengajian yang dibenarkan.
- (d) Pengiraan GPA dan CGPA akan mengambil kira kursus-kursus yang lulus dan gagal.

**(4) Pembelajaran Secara Intensif**

- (a) Sistem semester merupakan sistem pembelajaran yang intensif dan menggunakan kaedah penilaian secara sumatif dan formatif.
- (b) Penilaian pencapaian pelajar dibuat melalui kerja kursus dan peperiksaan akhir.
- (c) Kerja kursus ialah sebarang penilaian dalam tempoh perkuliahan bagi sesuatu kursus dalam satu semester seperti kuiz, ujian, tugasan, laporan dan sebagainya.

**(5) Penasihat Akademik**

- (a) Sistem pembelajaran di Universiti amat berbeza dengan sistem pembelajaran peringkat sekolah atau kolej di mana ia berdasarkan sistem pembelajaran yang fleksibel dan intensif serta mementingkan pengurusan masa yang berkesan. Seorang pelajar, dengan bimbingan Penasihat Akademik, sewajarnya mampu menamatkan pengajian dengan pencapaian akademik yang baik.
- (b) Setiap pelajar akan dibimbing oleh seorang Penasihat Akademik iaitu staf akademik yang dilantik oleh Fakulti bagi menasihati pelajar berkaitan hal-hal akademik. Pelajar perlu berjumpa dengan Penasihat Akademik sekurang-

kurangnya dua (2) kali dalam satu (1) semester (sila rujuk Buku Panduan Penasihat Akademik).

**(6) Status Tahun Pengajian Pelajar**

- (a) Pelajar dikategorikan mengikut tahun pengajian berdasarkan Kredit Dapat (KD). Status tahun pengajian pelajar ditentukan berdasarkan jumlah Kredit Dapat semasa mengikut formula  $KD \geq (JKL - 6)$  dengan JKL ialah Jumlah Kredit Lazim yang ditentukan oleh Fakulti untuk tahun pengajian sebelumnya.

**(7) Syarat Penganugerahan Ijazah Sarjana Muda Atau Diploma**

- (a) Pelajar yang telah lulus semua syarat yang ditetapkan oleh Universiti akan dianugerahkan Ijazah Sarjana Muda atau Diploma mengikut bidang masing-masing tertakluk kepada Perenggan 10 (1) Syarat Penganugerahan Garis Panduan ini.

## **BAHAGIAN II**

### **2. PENDAFTARAN PROGRAM DAN KURSUS**

Semua calon pelajar dimestikan membuat pendaftaran program dan pendaftaran kursus mengikut tarikh dan tempoh masa yang ditetapkan oleh Universiti.

#### **(1) Pendaftaran Program Calon Pelajar**

- (a) Semua calon pelajar diwajibkan mendaftar program pengajian masing-masing pada tarikh dan mengikut butiran yang dinyatakan di dalam surat tawaran kemasukan ke Universiti.
- (b) Tatacara pendaftaran program adalah seperti berikut:
  - (i) Pada hari pendaftaran, calon pelajar perlu membawa surat tawaran kemasukan ke Universiti, dokumen-dokumen asal yang berkaitan, salinan dokumen berkaitan yang telah disahkan serta lain-lain dokumen yang diperlukan.
  - (ii) Setelah mendaftar, pelajar akan diberi nombor matrik. Nombor matrik pelajar mengandungi maklumat berikut:

1	2	3	4	5	6	7	8	9	10
---	---	---	---	---	---	---	---	---	----

- (a) Kotak 1 mengandungi kod program. 'B' bagi program Sarjana Muda dan 'D' bagi program Diploma.
- (b) Kotak 2 mewakili mod pengajian 'S' bagi program separa masa.
- (c) Kotak 3 dan 4 mengandungi kod Fakulti seperti di Jadual 2.

**Jadual 2: Kod Fakulti**

Kod	Fakulti
01	Fakulti Kejuruteraan Elektrik
02	Fakulti Kejuruteraan Elektronik dan Kejuruteraan Komputer
03	Fakulti Teknologi Maklumat dan Komunikasi
04	Fakulti Kejuruteraan Mekanikal
05	Fakulti Kejuruteraan Pembuatan
06	Fakulti Pengurusan Teknologi dan Teknousahawanan
07	Fakulti Teknologi Kejuruteraan
08	Fakulti Teknologi Kejuruteraan Elektrik dan Elektronik
09	Fakulti Teknologi Kejuruteraan Mekanikal dan Pembuatan

- (d) Kotak **5** dan **6** mengandungi kod Sesi Akademik kemasukan pelajar seperti di Jadual 3.

**Jadual 3: Contoh kod Sesi Akademik**

Kod	Sesi Akademik
01	2001/2002
02	2002/2003
03	2003/2004
04	2004/2005
...	...
11	2011/2012
12	2012/2013
13	2013/2014
14	2014/2015

- (e) Kotak **7** mengandungi semester kemasukan pelajar, 1 untuk Semester I dan 2 untuk Semester II.

- (f) Kotak **8**, **9** dan **10** mengandungi nombor daftar pelajar.

**Contoh:** BS01171001 ialah pelajar program Ijazah Sarjana Muda Separa Masa di Fakulti Kejuruteraan Elektrik Sesi Akademik kemasukan 2017/2018 Semester I dengan nombor daftar pelajar 001.

- (c) Universiti boleh menetapkan tatacara yang lain bagi pendaftaran program.
- (d) Calon pelajar hendaklah menjelaskan semua bayaran yuran pengajian yang dinyatakan di dalam surat tawaran kemasukan mengikut kaedah yang telah ditetapkan selewat-lewatnya pada hari pendaftaran program. Pihak Universiti berhak menolak pendaftaran sekiranya calon pelajar berkenaan tidak menjelaskan semua bayaran yang ditetapkan di dalam surat tawaran kemasukan (sila rujuk Pekeliling Bendahari mengenai Peraturan Pembayaran Pelajar).
- (e) Universiti berhak membatalkan tawaran program kepada pelajar jika pelajar gagal mematuhi peraturan pendaftaran program.

- (f) Pelajar tidak dibenarkan menukar kursus pengajiannya. Semua tawaran kemasukan yang diberikan adalah muktamad dan sebarang rayuan tidak akan dipertimbangkan.

**(2) Pendaftaran Program Pelajar Kanan**

- (a) Pendaftaran program pelajar kanan dibuat secara automatik oleh pentadbiran Universiti berdasarkan kepada keputusan peperiksaan semester sebelumnya.
- (b) Pelajar yang telah terputus pengajian disebabkan oleh penangguhan pengajian, ditangguhkan pengajian, digantung pengajian atau sebagainya wajib mendaftar semula program di **Pusat Pembelajaran Sepanjang Hayat (PPSH)** bagi membolehkan status pelajar diaktifkan.
- (c) Pelajar yang telah selesai menjalani program mobiliti diwajibkan melakukan pendaftaran semula program di PPSH pada hari pertama perkuliahan semester.
- (d) Pelajar tidak dibenarkan menukar program pengajiannya kecuali disokong oleh Fakulti dan mendapat kelulusan Universiti.

**(3) Pendaftaran Kursus**

- (a) Pelajar yang telah mendaftar program, diwajibkan mendaftar kursus yang akan diambil pada sesuatu semester. Tujuan pendaftaran ini adalah untuk mengemaskinikan rekod akademik dan perkuliahan pelajar. Pelajar yang belum mendaftar program tidak boleh mendaftar kursus.
- (b) Sebelum pendaftaran dilakukan, pelajar perlu berbincang dengan Penasihat Akademik untuk membuat pemilihan kursus (sila rujuk Buku Panduan Akademik Fakulti bagi kohort pelajar yang berkaitan).
- (c) Pelajar yang gagal membuat pendaftaran kursus boleh dikenakan tindakan seperti berikut:
  - (i) tidak dibenarkan mengikuti sebarang perkuliahan dan penilaian.
  - (ii) dikenakan denda lewat pendaftaran kursus.
  - (iii) diberhentikan daripada pengajian.
- (d) Pelajar yang gagal membuat pendaftaran kursus di dalam Tempoh Pendaftaran Wajib Kursus dikehendaki melakukannya di dalam Tempoh

Pendaftaran Lewat Berdenda iaitu minggu dua (2) hingga minggu tiga (3). Jika pelajar masih gagal membuat pendaftaran kursus dalam Tempoh Pendaftaran Lewat Berdenda, pelajar akan diberhentikan dari pengajian kecuali atas sebab-sebab yang dapat diterima oleh Universiti dan akan dikenakan denda yang ditetapkan oleh Universiti.

#### (4) Tatacara Pendaftaran Kursus

- (a) Bagi pelajar baharu, pendaftaran kursus lazimnya dibuat semasa Hari Bersama Pelajar Baharu Separa Masa di PPSH bersama-sama Penasihat Akademik. Pendaftaran kursus hendaklah dibuat melalui **Sistem Pembelajaran Sepanjang Hayat (SPSH)**.
- (b) Bagi pelajar kanan, pendaftaran kursus semester berikutnya hendaklah dibuat oleh pelajar sendiri melalui sistem SPSH bersama-sama Penasihat Akademik. Butiran pendaftaran kursus yang didaftarkan oleh pelajar akan disemak dan diluluskan oleh Penasihat Akademik secara atas talian.
- (c) Semua pendaftaran kursus bagi setiap semester hendaklah dilakukan oleh pelajar di dalam tempoh dua (2) minggu bermula dari seminggu sebelum dan seminggu selepas tarikh semester tersebut bermula (iaitu Tempoh Pendaftaran Wajib Kursus) tertakluk kepada Jadual Kerja Urusan Pendaftaran Kursus Semester terkini.
- (d) Slip Pendaftaran Kursus hendaklah dicetak oleh pelajar setelah pendaftaran diluluskan oleh Penasihat Akademik. Bagi pendaftaran kursus yang tidak diluluskan oleh Penasihat Akademik, pelajar perlu membuat pendaftaran semula pada minggu kedua (2) hingga ketiga (3) semester tersebut menggunakan sistem SPSH bersama-sama Penasihat Akademik.
- (e) Pelajar yang tidak membuat pendaftaran kursus di dalam Tempoh Pendaftaran Wajib Kursus dimestikan mendaftar kursus di dalam Tempoh Pendaftaran Lewat Berdenda (iaitu minggu kedua (2) hingga ketiga (3) semester bermula) di PPSH dan akan dikenakan denda. Kadar bayaran denda ialah RM25.00 bagi setiap kursus tetapi tidak melebihi RM200.00 bagi ke semua kursus yang didaftarkan.

- (f) Proses naik tahun pengajian akan dilakukan selepas semua keputusan peperiksaan disahkan oleh Senat. Semasa proses naik tahun pengajian dilakukan, semua pendaftaran kursus yang telah dibuat oleh pelajar yang mendapat KS atau gagal pra-syarat adalah terbatal. Pelajar-pelajar ini perlu membuat pendaftaran semula di PPSH dalam tempoh dua (2) minggu pertama semester bermula.
- (g) Pelajar boleh menambah dan/atau membuat pembetulan pendaftaran kursus melalui sistem SPSH bersama dengan Penasihat Akademik masing-masing pada minggu kedua (2) hingga ketiga (3) semester tersebut.
- (h) Pada minggu keempat (4) semester, pelajar hanya boleh menggugur kursus melalui sistem SPSH bersama Penasihat Akademik masing-masing.
- (i) Semua pelajar program Ijazah Sarjana Muda dan program Diploma disyaratkan mendaftar kursus mengikut jam kredit minimum dan maksimum bagi sesuatu Semester Lazim dan Semester Pendek seperti Jadual 4.

**Jadual 4: Jam Kredit Minimum dan Maksimum Bagi Sesuatu Semester Lazim dan Semester Pendek**

Program	Kredit Minimum		Kredit Maksimum	
	Semester Lazim	Semester Pendek	Semester Lazim	Semester Pendek
Ijazah Sarjana Muda Kejuruteraan	6	2	12	6
Ijazah Sarjana Muda selain Kejuruteraan	6	2	12	6
Diploma Kejuruteraan	6	2	12	6
Diploma (selain Kejuruteraan)	6	2	12	6

- (j) Pelajar yang mengambil kurang daripada kredit minimum atau lebih daripada kredit maksimum di atas hendaklah mendapat kelulusan khas Dekan. Pelajar perlu memohon menggunakan Borang Pendaftaran Kursus dan mendaftar di PPSH.
- (k) Pelajar KS disyaratkan mendaftar kursus dengan jumlah maksimum enam (6) kredit sahaja. Di dalam keadaan tertentu, pelajar boleh mendaftar lebih daripada enam (6) kredit tertakluk kepada kelulusan khas Dekan.

- (l) Pelajar hendaklah mendaftar kursus yang telah ditetapkan dan ditawarkan oleh Fakulti pelajar. Walau bagaimanapun pelajar dibenarkan untuk mendaftar apa-apa kursus di luar kurikulum program semasa sebagai Kursus Audit dengan kelulusan Dekan. Sekiranya Kursus Audit yang diambil melibatkan Fakulti lain, kelulusan kedua-dua Dekan Fakulti terlibat perlu diperolehi. Pendaftaran Kursus Audit hendaklah dibuat dalam tempoh dua (2) minggu pertama semester bermula di PPSH.
- (m) Kadar yuran bagi Diploma dan Ijazah Sarjana Muda adalah mengikut kadar yang telah diluluskan oleh Universiti mengikut program dan lokasi pusat pembelajaran yang dijalankan.
- (n) Setiap kursus yang diambil pada sesuatu semester hendaklah didaftarkan dengan betul dan sempurna iaitu dengan menyatakan kod kursus, seksyen, jumlah kredit kursus berkenaan serta status kursus tersebut seperti **Ulang Kursus (UM)**, **Hadir Wajib (HW)**, **Hadir Wajib Ulang Kursus (HWUM)**, **Ulang Gred (UG)** atau **Tebus Kursus (TM)**.
- (o) Sebarang kursus yang diulang oleh pelajar hendaklah didaftarkan dengan status **UM**, **HW**, **UM** atau **UG**.
- (p) Pelajar semester akhir yang telah memenuhi syarat jumlah kredit untuk bergraduat tetapi mendapat keputusan KS boleh diberi peluang untuk membaiki Kedudukan Akademiknya dengan kelulusan Dekan tertakluk kepada syarat-syarat berikut:
  - (i) pelajar dikehendaki mengulang beberapa kursus (kecuali Projek, Bengkel dan Latihan Industri) menggunakan status TM; dan
  - (ii) tempoh maksimum pengajian pelajar belum tamat.
- (q) Kursus yang diulang tetapi kodnya telah berubah kepada kod baru, pelajar perlu mendaftar dengan menggunakan kod terkini dengan status UM. Fakulti dimestikan mendaftarkan persetaraan kod terkini kepada kod kursus lama pada setiap kohort terlibat.
- (r) Pelajar dibenarkan untuk membaiki gred kursus di sepanjang tempoh pengajian dengan syarat kursus tersebut (kecuali kursus Projek Diploma dan Projek Sarjana Muda) mendapat gred D hingga gred B-. Kebenaran untuk membaiki gred kursus diberikan sepanjang tempoh pengajian dan pelajar

perlu mendaftar kod kursus yang sama atau setara dengan menggunakan status UG.

- (s) Pelajar hendaklah lulus kursus pra-syarat sebelum mendaftar kursus seterusnya yang mempunyai pra-syarat tersebut.
- (t) Pelajar adalah bertanggungjawab untuk menyemak dan memastikan bahawa semua maklumat yang tercatat di dalam Slip Pendaftaran Kursus itu betul sebagaimana yang dikehendaki. Slip Pendaftaran Kursus hendaklah disimpan oleh pelajar untuk rujukan pada masa hadapan.
- (u) Pendaftaran kursus hendaklah dibuat mengikut tatacara di atas yang telah ditetapkan oleh Senat. Pendaftaran yang dibuat dengan tidak mematuhi tatacara ini tidak akan diterima atau dipertimbangkan.

#### **(5) Kod Kursus**

- (a) Setiap kod kursus yang ditawarkan oleh Fakulti mestilah dalam format berikut:

1	2	3	4	5	6	7	8	9
---	---	---	---	---	---	---	---	---

- (i) Kotak 1 mengandungi abjad yang merujuk kepada program seperti berikut:

Abjad	Program
B	Sarjana Muda
D	Diploma

- (ii) Kotak 2 dan Kotak 3 mengandungi kod Fakulti/Pusat seperti di Jadual 5.

**Jadual 5: Kod Kursus Fakulti**

Fakulti/Pusat	Kod
Fakulti Kejuruteraan Elektronik & Kejuruteraan Komputer	EN
Fakulti Kejuruteraan Elektrik	EK
Fakulti Kejuruteraan Mekanikal	MC
Fakulti Kejuruteraan Pembuatan	MF
Fakulti Teknologi Maklumat & Komunikasi	IT
Fakulti Pengurusan Teknologi dan Teknousahawanan	TM
Fakulti Teknologi Kejuruteraan	ET

Fakulti Teknologi Kejuruteraan Elektrik dan Elektronik	EE
Fakulti Teknologi Kejuruteraan Mekanikal dan Pembuatan	MM
Pusat Pembelajaran Bahasa	LL
Institut Pengurusan Teknologi dan Keusahawanan	IP atau KK

\*Kursus ko-kurikulum menggunakan kod KK.

- (iii) Kotak 4 mengandungi abjad yang merujuk kepada perkara-perkara berikut:

- (a) Kotak 4 mengandungi abjad yang merujuk kepada jabatan yang menawarkan kursus.

**Contoh:** Bagi Fakulti Teknologi Maklumat dan Komunikasi, Kod Jabatan adalah:

P: Untuk Jabatan Kejuruteraan Perisian

S: Untuk Jabatan Sistem dan Komunikasi Komputer

M: Untuk Jabatan Media Interaktif

- (b) Kotak 4 mengandungi abjad U bagi kursus yang ditawarkan oleh sesuatu Fakulti kepada semua program di Fakulti berkenaan (iaitu kursus umum Fakulti).

- (c) Kotak 4 mengandungi abjad G bagi kursus yang ditawarkan oleh sesuatu Fakulti kepada Fakulti yang lain (iaitu kursus servis).

**Contoh:**

BMCG ⇒ Kursus Ijazah Sarjana Muda yang ditawarkan oleh Fakulti Kejuruteraan Mekanikal kepada Fakulti lain.

- (d) Kotak 4 mengandungi abjad W bagi Kursus Wajib Universiti.

- (iv) Kotak 5, 6, 7 dan 8 merujuk kepada tahun pengajian, bidang pengajian dan kredit kursus iaitu:

- (a) Kotak 5 mengandungi angka yang merujuk kepada tahun pengajian lazim kursus itu ditawarkan.

- (b) Kotak 6 dan Kotak 7 diberi kepada Fakulti untuk diisi dengan angka-angka yang merujuk kepada agihan mengikut bidang atau jabatan.

- (c) Kotak 8 mengandungi angka merujuk kepada kredit kursus berkenaan.

**Contoh:**

BENE 3213 ialah kursus dalam program Ijazah Sarjana Muda (B) yang ditawarkan oleh Fakulti Kejuruteraan Elektronik dan Kejuruteraan Komputer (EN) dari Jabatan Elektronik Industri (E) lazimnya ditawar pada tahun 3, dengan nombor agihan jabatan (21) dan mempunyai nilai 3 kredit.

- (d) Kotak 9 mengandungi abjad M yang merujuk kepada Kursus Terbuka Leluasa Atas Talian (MOOC).

**(6) Kategori Kursus**

- (a) Kursus yang ditawarkan dalam sesuatu program dikategorikan seperti berikut:
- (i) W = Kursus Wajib Universiti, iaitu kumpulan kursus yang ditentukan oleh Senat yang wajib diambil oleh semua pelajar.
  - (ii) P = Kursus Teras Program, iaitu kumpulan kursus yang ditentukan oleh Fakulti dan wajib diambil oleh semua pelajar yang mengikuti program yang ditawarkan oleh Fakulti.
  - (iii) K = Kursus Teras Pengkhususan, iaitu kumpulan kursus yang ditentukan oleh Fakulti dan wajib diambil oleh pelajar yang mengikuti sesuatu program.
  - (iv) E = Kursus Elektif, iaitu kumpulan kursus pilihan yang ditawarkan bagi mendalami sesuatu program.
  - (v) U = Kursus Audit, iaitu kursus tambahan yang diambil oleh pelajar yang bukan merupakan keperluan kurikulum program yang sedang diikuti.

**(7) Status Kursus**

- (a) Selain daripada kursus biasa, ada beberapa kursus yang mempunyai status tertentu seperti berikut:
- (i) **HW = HADIR WAJIB**  
Status HW diberikan kepada kursus yang kreditnya tidak diambil kira dalam pengiraan GPA dan CGPA tetapi diambil kira dalam Kredit Dapat. Bagi kursus ini, keputusan akan diberi gred HL (Hadir Lulus) atau HG (Hadir Gagal).

(ii) **UM = ULANG KURSUS**

Status UM diberikan kepada kursus yang diulang oleh pelajar yang telah gagal dalam kursus tersebut sebelumnya. Kredit kursus UM tidak diambil kira untuk tujuan pengiraan CGPA.

(iii) **HWUM = HADIR WAJIB ULANG KURSUS**

Status HWUM diberi kepada kursus Hadir Wajib yang diulangi oleh pelajar yang gagal dalam kursus tersebut sebelumnya.

(iv) **UG = ULANG GRED**

Status UG diberi kepada kursus yang diulangi oleh pelajar bagi tujuan membaiki gred.

(v) **TM = TEBUS KURSUS**

Status TM diberi kepada kursus yang diulangi oleh pelajar semester akhir yang mendapat KS.

**(8) Kursus Pra-Syarat**

- (a) Kursus pra-syarat ialah kursus yang ditentukan oleh Fakulti sebagai asas kepada kursus berikutnya.
- (b) Pelajar hendaklah lulus kursus pra-syarat sebelum mendaftar kursus seterusnya yang mempunyai pra-syarat tersebut kecuali setelah mendapat kelulusan khas Dekan Fakulti atau Pusat yang menawarkan kursus tersebut.

**(9) Pembetulan Pendaftaran Kursus**

- (a) Pelajar adalah bertanggungjawab untuk menyemak dan memastikan bahawa semua yang tercatat dalam Slip Pendaftaran Kursus itu betul sebagaimana yang didaftarkan.
- (b) Pelajar hendaklah membetulkan sebarang kesilapan yang terdapat di dalam Slip Pendaftaran Kursus di dalam tempoh dan mengikut peraturan yang telah ditetapkan (sila rujuk Jadual Kerja Urusan Pendaftaran Kursus semester semasa).
- (c) Segala kesilapan yang tidak dibetulkan akan mengakibatkan kesilapan rekod akademik pelajar dan pelajar akan menghadapi masalah berikut:
  - (i) Tidak dibenarkan mengikuti kuliah kursus sebenar.

- (ii) Segala penilaian di dalam kursus berkenaan tidak diambil kira dan akan diberi markah 0 (gred E).
- (d) Jika pelajar gagal membuat pembetulan pendaftaran kursus sehingga tempoh yang ditetapkan, keputusan peperiksaan kursus yang tidak didaftarkan akan digantung.
- (e) Permohonan pelajar untuk membetulkan pendaftaran kursus selepas tarikh yang ditetapkan akan dikenakan bayaran denda. Kadar denda ialah RM50.00 bagi setiap kod pembetulan tertakluk kepada maksimum RM200.00.

#### **(10) Tarik Diri Kursus**

- (a) Pelajar boleh memohon untuk Tarik Diri mana-mana kursus yang telah didaftarkan dengan syarat-syarat berikut:
  - (i) baki jumlah kredit kursus yang berdaftar mestilah tidak kurang daripada kredit minimum enam (6) kredit bagi Semester Lazim dan dua (2) kredit bagi Semester Pendek kecuali dengan kelulusan khas Dekan.
  - (ii) permohonan untuk Tarik Diri kursus hendaklah dibuat melalui Penasihat Akademik iaitu mulai minggu kelima (5) hingga minggu ketiga belas (13) semester. Walaubagaimanapun, bagi Semester Pendek dari minggu keempat (4) hingga minggu kelima (5) semester.
  - (iii) Tarik Diri Kursus Wajib Universiti adalah tidak dibenarkan kecuali dengan kelulusan khas Dekan.
- (b) Status TD bagi kursus Tarik Diri akan dicatatkan di dalam Slip Pendaftaran Kursus dan transkrip.
- (c) Pelajar dikehendaki mengambil semula kursus berkenaan kecuali bagi kursus yang bukan merupakan keperluan program pelajar.
- (d) Sebarang yuran yang telah dibayar tidak akan dikembalikan.

#### **(11) Penangguhan Pengajian**

- (a) Pelajar boleh mengemukakan pemohonan rasmi secara bertulis melalui Dekan Fakulti kepada PPSH untuk menangguhkan pengajian. Tangguh pengajian boleh dibuat berdasarkan alasan berikut:

**(i) Alasan Kesihatan**

- (a) Pelajar mesti mengemukakan permohonan beserta Sijil Cuti Sakit atau surat sokongan dan pengesahan status kesihatan daripada Pegawai Perubatan Universiti atau Hospital/Klinik Kerajaan.
- (b) Sekiranya pelajar mengemukakan Sijil Cuti Sakit atau surat sokongan dan pengesahan status kesihatan daripada Hospital/Klinik Swasta, pelajar dikehendaki mendapatkan pengesahan daripada Pegawai Perubatan Universiti atau Hospital/Klinik Kerajaan.
- (c) Sekiranya permohonan diluluskan oleh Senat, tempoh penangguhan tersebut tidak diambil kira dalam bilangan semester yang digunakan.

**(ii) Alasan-alasan Lain**

- (a) Pelajar juga boleh memohon menangguh pengajian atas alasan selain dari sebab-sebab kesihatan.
  - (b) Permohonan mestilah dibuat sebelum akhir minggu ketiga belas (13) Semester Lazim dan akhir minggu kelima (5) Semester Pendek.
  - (c) Sekiranya permohonan diluluskan oleh Senat, tempoh penangguhan tersebut akan diambil kira dalam pengiraan bilangan semester yang digunakan. Walau bagaimanapun Senat boleh meluluskan tempoh penangguhan tersebut tidak diambil kira bagi pelajar yang terlibat dengan Mod Industri atau "Gap Year".
  - (d) Sekiranya pelajar mempunyai penaja, pelajar bertanggungjawab memaklumkan penangguhan pengajian kepada penaja.
- (b) Pembayaran dan pemulangan yuran pengajian untuk pelajar yang diluluskan untuk tangguh pengajian atas alasan kesihatan atau alasan-alasan lain adalah tertakluk kepada syarat-syarat berikut:
- (i) Pelajar yang memohon penangguhan pengajian atas alasan selain kesihatan tidak lewat daripada hari bekerja terakhir minggu ketujuh (7)

Semester Lazim dan minggu keempat (4) Semester Pendek dikehendaki membayar lima puluh peratus (50%) yuran pengajian. Sekiranya pelajar telah membayar yuran tersebut, lima puluh peratus (50%) dari jumlah yuran pelajaran akan dipulangkan. Walau bagaimanapun yuran-yuran di bawah masih perlu dibayar atau jika pelajar telah pun membayar yuran tersebut, ianya tidak akan dipulangkan:

- (a) Yuran Pendaftaran
- (b) Yuran Ko-kurikulum
- (c) Yuran Kad Matrik
- (d) Yuran Minggu Haluan Siswa.
- (e) Yuran Alumni
- (f) Yuran Aktiviti & Khairat Pelajar
- (g) Yuran Perkhidmatan

Yuran Penginapan perlu dibayar mengikut bilangan hari pelajar menginap di Kolej Kediaman.

- (ii) Pelajar yang memohon penangguhan pengajian atas alasan selain kesihatan bermula minggu kelapan (8) pada sesuatu Semester Lazim dan minggu kelima (5) pada Semester Pendek dikehendaki membayar seratus peratus (100%) semua yuran-yuran di bawah: -

- (a) Yuran Pendaftaran
- (b) Yuran Ko-kurikulum
- (c) Yuran Kad Matrik
- (d) Yuran Minggu Haluan Siswa.
- (e) Yuran Alumni
- (f) Yuran Pelajaran
- (g) Yuran Perkhidmatan
- (h) Yuran Aktiviti & Khairat Pelajar

Yuran Penginapan perlu dibayar mengikut bilangan hari pelajar menginap di Kolej Kediaman.

- (iii) Pelajar yang memohon penangguhan pengajian atas sebab-sebab kesihatan, semua yuran akan dipulangkan kecuali:
- (a) Yuran Pendaftaran
  - (b) Yuran Ko-kurikulum
  - (c) Yuran Kad Matrik
  - (d) Yuran Minggu Haluan Siswa.
  - (e) Yuran Alumni
  - (f) Yuran Aktiviti & Khairat Pelajar
- Yuran Penginapan masih perlu dibayar mengikut bilangan hari pelajar menginap di Kolej Kediaman.
- (iv) Pelajar yang ditangguhkan pengajian oleh Senat berdasarkan keputusan Kedudukan Akademik semester semasa, tidak layak untuk menerima apa-apa pemulangan dan Universiti berhak membuat tuntutan terhadap yuran, caj dan apa-apa bayaran tertunggak daripada pelajar, penjamin atau waris pelajar.

## **(12) Penggantungan Pengajian**

- (a) Semasa mengikuti pengajian pelajar boleh digantung pengajian mereka atas sebab-sebab berikut:
  - (i) Tindakan tatatertib.
  - (ii) Gagal menjelaskan hutang Universiti.
- (b) Kesan-kesan penggantungan adalah seperti berikut:
  - (i) Tempoh penggantungan pengajian akan dikira bagi tujuan pengiraan tempoh pengajian di Universiti ini.
  - (ii) Penggantungan akan memberi kesan kepada beraswa/bantuan kewangan yang diberi oleh penaja kerana pemberian beraswa biasanya berdasarkan tempoh pengajian minimum sesuatu kursus.
  - (iii) Pelajar akan lewat menamatkan pengajian.
  - (iv) Pelajar tidak dibenarkan menggunakan sebarang kemudahan dan perkhidmatan Universiti di dalam tempoh penggantungan.

- (v) Pelajar tidak layak untuk menerima apa-apa pemulangan dan Universiti berhak membuat tuntutan terhadap yuran, caj dan apa-apa bayaran tertunggak daripada pelajar, penjamin dan waris pelajar.

**(13) Permohonan Berhenti Dari Pengajian**

- (a) Pelajar boleh memohon untuk berhenti dari pengajian dengan membuat permohonan menggunakan Borang Permohonan Berhenti Dari Pengajian yang boleh diperolehi dari pejabat pentadbiran Fakulti atau PPSH.
- (b) Pelajar tidak dibenarkan meninggalkan pengajiannya sebelum keputusan mengenai permohonannya diputuskan oleh Universiti.
- (c) Jika permohonan berhenti dari pengajian dibuat dalam tempoh 14 hari dari tarikh pelajar mendaftar program semester semasa, semua yuran semester semasa akan dipulangkan kepada pelajar kecuali:
  - (i) Yuran Pendaftaran
  - (ii) Yuran Kad Matrik
  - (iii) Yuran Yuran Minggu Haluan SiswaYuran Penginapan hendaklah dibayar mengikut bilangan hari pelajar menginap di Kolej Kediaman.
- (d) Pelajar yang berhenti dari pengajian selepas tempoh 14 hari dari tarikh pelajar mendaftar program semester semasa, dikehendaki menyelesaikan seratus peratus (100%) semua yuran di bawah:
  - (i) Yuran Pendaftaran
  - (ii) Yuran Ko-kurikulum
  - (iii) Yuran Kad Matrik
  - (iv) Yuran Minggu Haluan Siswa
  - (v) Yuran Alumni
  - (vi) Yuran Pelajaran
  - (vii) Yuran Perkhidmatan
  - (viii) Yuran Aktiviti dan Khairat PelajarYuran Penginapan hendaklah dibayar mengikut bilangan hari pelajar menginap di Kolej Kediaman.

- (e) Pelajar yang berhenti dari pengajian adalah dipertanggungjawabkan di atas apa jua implikasi daripada tindakan ini. Universiti berhak membuat tuntutan terhadap yuran, caj dan apa-apa bayaran tertunggak daripada pelajar, penjamin dan waris pelajar.

### **BAHAGIAN III**

#### **3. PENGENDALIAN SEMESTER PENDEK**

##### **(1) Tempoh Pengajian**

Tempoh pengajian Semester Pendek diambil kira dalam pengiraan tempoh pengajian yang ditetapkan bagi sesuatu program.

##### **(2) Kursus Yang Ditawarkan**

- (a) Jumlah kredit maksimum yang boleh didaftarkan oleh pelajar ialah enam (6) kredit.
- (b) Kursus yang boleh ditawarkan di dalam Semester Pendek adalah seperti mana penawaran pada Semester Lazim kecuali PSM, IDP atau Projek Diploma tertakluk kepada kelulusan Universiti.

##### **(3) Pendaftaran Kursus**

- (a) Pelajar hendaklah mendaftar setiap kursus yang diambil pada Semester Pendek mengikut peraturan dan prosedur yang telah ditetapkan oleh Universiti.
- (b) Pendaftaran kursus Semester Pendek hendaklah dilakukan oleh pelajar di dalam dua (2) minggu bermula dari seminggu sebelum dan seminggu selepas tarikh semester tersebut bermula (iaitu Tempoh Pendaftaran Wajib Kursus) tertakluk kepada Jadual Kerja Urusan Pendaftaran Kursus Semester.
- (c) Pelajar yang tidak membuat pendaftaran kursus di dalam tempoh di atas dimestikan mendaftar kursus di dalam Tempoh Pendaftaran Lewat Berdenda (iaitu minggu kedua (2) hingga ketiga (3) Semester Pendek) di PPSH dan akan dikenakan denda mengikut kadar denda pendaftaran lewat kursus.
- (d) Pelajar yang mengulang kursus (UM/UG) hendaklah mendaftar kursus pada minggu 2 hingga minggu 3 semester di PPSH.
- (e) Pelajar dibenarkan menarik diri daripada mengikuti kursus yang telah didaftarkan sehingga minggu kelima (5) Semester Pendek tertakluk kepada kelulusan Dekan.

- (f) Fakulti boleh menentukan bilangan pelajar yang dibenarkan mendaftar sesuatu kursus yang ditawarkan dalam Semester Pendek.
- (g) Yuran akan dikenakan untuk kursus yang ditawarkan. Jika pelajar menarik diri, yuran tidak akan dikembalikan.

**(4) Penentuan Kedudukan Akademik**

- (a) Kedudukan Akademik pelajar untuk Semester Pendek akan ditentukan sama seperti Semester Lazim.

**(5) Yuran**

- (a) Kadar yuran bagi Diploma dan Ijazah Sarjana Muda adalah mengikut kadar yang telah diluluskan oleh Universiti mengikut program dan lokasi pusat pembelajaran yang dijalankan.
- (b) Yuran Penginapan hendaklah dibayar mengikut kadar bilangan hari pelajar menginap di Kolej Kediaman.
- (c) Cara Pembayaran
  - (i) Yuran Semester Pendek akan caj ke akaun pelajar sebaik sahaja pendaftaran kursus dilakukan di PPSH. Pelajar wajib menjelaskan semua bayaran yuran Semester Pendek yang dikenakan mengikut peraturan pembayaran pelajar.
  - (ii) Bagi pelajar yang gagal menjelaskan semua bayaran yuran yang dikenakan, keputusan peperiksaan akan digantung.

## **BAHAGIAN IV**

### **4. SISTEM KREDIT**

Di dalam sistem semester setiap kursus mempunyai nilai kredit, kecuali mana-mana kursus yang dibenarkan oleh Senat. Kredit adalah ukuran kuantitatif semua aktiviti pembelajaran atau beban pembelajaran untuk mencapai hasil pembelajaran tertentu. Hasil pembelajaran adalah pernyataan tentang kebolehan pelajar apabila tamat suatu tempoh pengajian.

Bagi mencapai hasil pembelajaran, pelajar perlu memperuntukkan masa pembelajaran (juga dikenali sebagai Masa Pembelajaran Pelajar). Masa Pembelajaran Pelajar merangkumi masa pelaksanaan semua aktiviti pembelajaran termasuklah pertemuan rasmi (seperti kuliah), pembelajaran berpandu (seperti tutorial, seminar, praktikal, kerja lapangan), pembelajaran bersendirian (seperti pembelajaran kendiri, pencarian maklumat, kajian) serta persediaan dan menduduki peperiksaan.

Sebagai garis panduan umum, pelajar perlu memperuntukkan 40 jam masa pembelajaran untuk satu (1) jam kredit kursus.

Bagi satu semester dengan sesi perkuliahan selama 14 minggu, satu (1) jam kredit adalah bersamaan:

- (i) 14 jam per semester sesi kuliah; atau
- (ii) 28 jam per semester sesi makmal atau bengkel; atau
- (iii) 14 jam per semester sesi tutorial berpandu; atau
- (iv) 28 jam per semester untuk aktiviti pembelajaran berpandu seperti aktiviti pembelajaran berdasarkan masalah, aktiviti pembelajaran teradun, aktiviti projek kerja kursus dan lawatan lapangan.

Satu (1) jam kredit juga adalah bersamaan tiga (3) jam aktiviti Projek Sarjana Muda/Projek Diploma dan Projek Rekabentuk Bersepadu termasuk pertemuan dengan penyelia. Satu (1) jam kredit juga adalah bersamaan dua (2) minggu aktiviti latihan industri.

Sebagai garis panduan untuk menganggarkan masa pembelajaran kendiri, pelajar boleh memperuntukkan:

- (i) 4 jam tempoh ulang kaji untuk setiap 1 jam penaksiran.
- (ii) 0.5 - 1 jam persiapan untuk setiap 1 jam kuliah.
- (iii) 0.5 - 1 jam persiapan untuk setiap 1 jam sesi makmal, bengkel dan tutorial berpandu.

### **(1) Penilaian Kredit**

Bentuk pertemuan kursus boleh terdiri daripada kuliah, tutorial, amali, tugas, projek dan sebagainya. Fakulti boleh menggabungkan semua bentuk pembelajaran.

- (a) Kredit Latihan Industri/Laporan Latihan Industri
- Kredit Latihan Industri adalah seperti di Jadual 6.

**Jadual 6: Kredit Latihan Industri/Laporan Latihan Industri**

Program	Kredit	Catatan		
		Semester	Tempoh (Minggu)	Status Kursus
Ijazah Sarjana Muda Kejuruteraan	5	Pendek	10	HW
Ijazah Sarjana Muda Sains Komputer/ Teknologi Maklumat	12	Lazim	20-24	HW (6 kredit untuk Latihan Industri) 6 kredit untuk Laporan Latihan Industri
Ijazah Sarjana Muda Pengurusan Teknologi	12	Lazim	20-24	HW (6 kredit untuk Latihan Industri) 6 kredit untuk Laporan Latihan Industri
Ijazah Sarjana Muda Teknousahawan	12	Lazim	20-24	HW (6 kredit untuk Latihan Industri) 6 kredit untuk Laporan Latihan Industri
Ijazah Sarjana Muda Teknologi Kejuruteraan	12	Lazim	20-24	HW (6 kredit untuk Latihan Industri) 6 kredit untuk Laporan Latihan Industri
Diploma Kejuruteraan	8	Lazim	16	HW
Diploma selain Kejuruteraan	5	Khas	10	HW

**(2) Kredit Untuk Bergraduat**

Kredit untuk bergraduat adalah jumlah kredit minimum dalam struktur kurikulum yang ditetapkan oleh Fakulti dengan kelulusan Senat yang pelajar wajib lulus untuk bergraduat.

**(3) Kredit Dapat**

Kredit Dapat ialah jumlah kredit yang diperolehi bagi kursus yang lulus, atau kursus yang lulus beserta gabungan mana-mana Pindah Kredit.

**(4) Kredit Kira**

Kredit Kira ialah jumlah kredit yang diperolehi bagi kursus yang lulus dan diambil kira dalam pengiraan GPA dan CGPA. Kredit kursus berstatus UM, UG dan TM tidak terlibat dalam pengiraan CGPA.

**(5) Beban Kredit Semester**

- (a) Pelajar mesti mengambil sekurang-kurangnya enam (6) kredit bagi Semester Lazim dan dua (2) kredit bagi Semester Pendek untuk dalam sesuatu semester kecuali pada semester akhir pelajar.
- (b) Pelajar dibenarkan mengambil maksimum dua belas (12) kredit bagi sesuatu Semester Lazim dan enam (6) kredit bagi Semester Pendek.
- (c) Pelajar yang ingin mengambil lebih daripada jumlah kredit maksimum di atas hendaklah mendapat kelulusan khas Dekan dan terhad kepada empat belas (14) kredit sahaja pada Semester Lazim.
- (d) Pelajar berstatus KS hanya dibenarkan mengambil maksimum enam (6) kredit pada semester berikutnya. Dalam keadaan tertentu, pelajar boleh mendaftar lebih daripada enam (6) kredit tertakluk kepada kelulusan khas Dekan.

**(6) Pengurangan dan Penambahan Kredit**

Pelajar boleh menambah atau mengurangkan kredit dengan kelulusan Penasihat Akademik dalam tempoh yang ditetapkan.

## (7) Pindah Kredit

Pindah Kredit adalah satu peruntukan yang membolehkan jumlah kredit yang telah diperolehi oleh pelajar setelah mengikuti dan lulus kursus tertentu di Universiti atau di mana-mana Institut Pengajian Tinggi (IPT) dalam atau luar negara dipindahkan kepada program semasa yang sedang diikuti di Universiti. Kursus yang telah diikuti hendaklah diiktiraf sebagai setara dan memenuhi keperluan kurikulum program yang diikuti. Jika diluluskan, jumlah kredit yang dipindahkan akan diambil kira di dalam jumlah kredit untuk bergraduat dan boleh diambil kira atau tidak diambil kira dalam pengiraan GPA dan CGPA tertakluk kepada syarat-syarat tertentu bagi Pindah Kredit Dengan Gred atau Pindah Kredit Tanpa Gred (juga dikenali sebagai Pengecualian Kredit). Kesan daripada Pindah Kredit yang diluluskan, pelajar tidak perlu mengikuti semula kursus yang dipindah kredit ke program pengajian semasa di Universiti. Tempoh pengajian berkemungkinan menjadi lebih pendek.

### (a) Pindah Kredit Dengan Gred

- (i) Adalah satu peruntukan yang disediakan oleh Peraturan Akademik di bawah sistem semester yang bertujuan untuk memberi kemudahan kepada mobiliti pelajar.
- (ii) Syarat-syarat Pindah Kredit Dengan Gred adalah seperti berikut:
  - (a) pelajar yang masih di dalam program pengajian;
  - (b) pemindahan kredit adalah secara mendatar (*horizontal*) iaitu melibatkan kredit kursus daripada program di peringkat kelayakan yang sama dengan program yang sedang diikuti seperti daripada sijil ke sijil/diploma ke diploma/ijazah sarjana muda ke ijazah sarjana muda.
  - (c) Pelajar telah lulus kursus dengan mendapat sekurang-kurangnya gred C atau setara;
  - (d) Nilai kredit satu kursus atau gabungan beberapa kursus yang telah lulus adalah sama atau lebih daripada nilai kredit kursus bagi program semasa yang diikuti di Universiti;
  - (e) Kandungan kursus yang telah lulus setara sekurang-kurangnya 80% dengan kandungan kursus program yang diikuti di Universiti; dan

- (f) Kursus yang dipohon Pindah Kredit hendaklah daripada program yang telah mendapat akreditasi/pengiktirafan dari badan yang berautoriti di negara berkenaan.
- (g) Jumlah Pindah Kredit yang dibenarkan adalah seperti di Jadual 7. Bagi Pindah Kredit yang melibatkan kredit kursus dari universiti lain ke Universiti ini, ia tertakluk kepada syarat pemastautin pelajar seperti yang berikut:
  - (i) Sarjana Muda: 1 Tahun
  - (ii) Diploma dan Sijil: 1 semester

**Jadual 7: Jumlah Pindah Kredit Dengan Gred Yang Dibenarkan**

Program	Jumlah Maksimum Pindah Kredit Dengan Gred yang Dibenarkan daripada Keseluruhan Kredit untuk Bergraduat
Ijazah Sarjana Muda Kejuruteraan / Sarjana Muda Teknologi Kejuruteraan / Diploma Kejuruteraan	50%
Lain-lain	Tiada Had (tetapi tertakluk kepada syarat pemastautin)

- (h) Jika Pindah Kredit Dengan Gred diluluskan, kredit kursus akan dikira dalam kredit bergraduat pelajar dan gred kursus diambil kira dalam pengiraan GPA dan CGPA.
- (iii) Situasi-situasi Pindah Kredit Dengan Gred adalah seperti berikut:
  - (a) Pelajar yang sedang mengikuti Diploma A bertukar ke Diploma B pada semester kedua. Pindah Kredit adalah dibenarkan. Proses Pindah Kredit pelajar tersebut akan mengambil kira gred kursus dari Diploma A dalam pengiraan GPA dan CGPA pelajar di Diploma B.
  - (b) Pelajar sedang mengikuti suatu program di Universiti dan dalam masa yang sama mengambil beberapa kursus di IPT yang lain

(seperti program mobiliti atau program pertukaran pelajar).

Pindah Kredit adalah dibenarkan.

- (c) Pelajar sedang mengikuti sesuatu program dan ingin bertukar ke program lain dalam bidang yang sama dengan program yang sedang diikuti.
- (i) Pindah Kredit dibenarkan.
  - (ii) Sekiranya pelajar sedang mengikuti sesuatu program di Universiti dan ingin bertukar ke program lain yang juga di bawah Universiti, had maksimum pemindahan kredit adalah seperti di Jadual 7.
  - (iii) Sekiranya pelajar sedang mengikuti sesuatu program di IPT/Universiti lain dan ingin bertukar ke satu program pengajian di Universiti, pemindahan kredit tertakluk kepada pelajar mematuhi syarat pemaustatin iaitu pelajar masih perlu mengikuti satu tempoh pengajian dengan Universiti ini sebelum layak dianugerahkan ijazah sarjana muda atau diploma. Tempoh permastautin (*residential year*) adalah seperti berikut:

(a) Ijazah Sarjana Muda – 1 tahun

(b) Diploma – 1 semester

Sebagai panduan, lazimnya keterkinian ilmu bagi sesuatu program adalah sekitar 5 tahun.

(b) **Pindah Kredit Tanpa Gred**

- (i) Satu peruntukan yang disediakan oleh Peraturan-Peraturan Akademik Bagi Program Ijazah Sarjana Muda Dan Diploma Universiti Teknikal Malaysia Melaka di bawah sistem semester ialah Pindah Kredit Tanpa Gred yang bertujuan untuk mengiktiraf pembelajaran terdahulu pelajar.
- (ii) Syarat-syarat Pindah Kredit Tanpa Gred (juga dikenali sebagai Pengecualian Kredit) adalah seperti berikut:
  - (a) Pelajar yang telah tamat pengajian atau telah mencapai tahap kompetensi dalam kursus yang berkenaan.

- (b) Pemindahan kredit adalah secara mendatar (*horizontal*) atau menegak (*vertical*) yang lazimnya melibatkan kredit kursus daripada program di peringkat kelayakan yang lebih rendah daripada program semasa yang sedang diikuti seperti daripada diploma ke ijazah sarjana muda.
- (c) Pelajar telah lulus kursus dengan mendapat sekurang-kurangnya gred C atau setara;
- (d) Nilai kredit satu kursus atau gabungan beberapa kursus yang telah lulus adalah sama atau lebih daripada nilai kredit kursus bagi program semasa yang diikuti di Universiti;
- (e) Kandungan kursus yang telah lulus setara sekurang-kurangnya 80% dengan kandungan kursus program yang diikuti di Universiti; dan
- (f) Kursus yang dipohon Pindah Kredit hendaklah daripada program yang telah mendapat akreditasi/pengiktirafan dari badan yang berautoriti di negara berkenaan.
- (g) Jumlah Pindah Kredit Tanpa Gred yang dibenarkan adalah seperti di Jadual 8. Bagi Pindah Kredit Tanpa Gred yang melibatkan kredit kursus dari universiti lain ke Universiti ini, ia tertakluk kepada syarat pemastautin pelajar seperti yang berikut:
  - (i) Sarjana Muda: 1 Tahun
  - (ii) Diploma dan Sijil: 1 Semester

**Jadual 8: Jumlah Maksimum Pindah Kredit Tanpa Gred (Pengecualian Kredit) Yang Dibenarkan**

Program	Jumlah Maksimum Pindah Kredit Tanpa Gred (Pengecualian Kredit) yang Dibenarkan daripada Keseluruhan Kredit untuk Bergraduat	
	Menegak	Mendatar
Ijazah Sarjana Muda Kejuruteraan / Sarjana Muda Teknologi Kejuruteraan / Diploma Kejuruteraan	30%	50%
Lain-lain	30%	Tiada Had (tetapi tertakluk kepada syarat pemastautin)

- (h) Kredit kursus yang dipindahkan diambil kira dalam kredit untuk bergraduat tetapi gred kursus tidak diambil kira dalam pengiraan GPA dan CGPA pelajar.
- (i) Situasi-situasi Pindah Kredit Tanpa Gred adalah seperti berikut:
  - (i) Pelajar lepasan diploma menyambung pengajian ke peringkat ijazah sarjana muda dan membuat Pindah Kredit bagi kursus-kursus yang bersesuaian. Maka kredit bagi kursus yang pernah diikuti di peringkat diploma akan diambil kira dalam pengiraan kredit untuk bergraduat pelajar. Namun, gred kursus tidak akan diambil kira dalam pengiraan GPA dan CGPA pelajar.
  - (ii) Pelajar yang telah tamat Diploma A dan kemudian ingin mengikuti Diploma B. Pindah kredit tidak akan mengambil kira gred kursus dalam pengiraan GPA dan CGPA pelajar di Diploma B.
  - (iii) Pindah kredit yang berdasarkan pengalaman melalui Pengakreditan Pengalaman Berasaskan Pembelajaran Terdahulu Bagi Tujuan Penganugerahan Kredit (APEL (C)) tidak melibatkan gred. Dalam kes ini hanya kredit yang akan diambil kira.
  - (iv) Kursus yang diambil menerusi platform MOOC, merupakan sebahagian daripada pembelajaran secara bukan formal (*non-formal*) dan tidak formal (*informal*). Pelajar yang telah mengikuti kursus menerusi platform MOOC dan lulus Ujian Kompetensi MOOC Universiti layak untuk memohon Pindah Kredit Tanpa Gred.
  - (v) Pindah Kredit daripada Sijil ke Diploma.  
Pindah Kredit dibenarkan dengan pindahan maksimum 30% daripada jumlah kredit untuk bergraduat bagi program Diploma yang akan diikuti.
  - (vi) Pindah Kredit daripada Diploma kepada Sarjana Muda.

Pindah Kredit dibenarkan tertakluk kepada had maksimum yang dinyatakan pada Jadual 8.

- (vii) Pemindahan kredit daripada Diploma Lanjutan ke Sarjana Muda.

Pelajar yang berkelayakan Diploma Lanjutan (dan turut memiliki Diploma) boleh dipertimbangkan Pindah Kredit sehingga maksimum dua (2) tahun pengajian program peringkat sarjana muda (pelajar akan mengikuti tahun ketiga Program Sarjana Muda).

- (viii) Pemindahan kredit daripada kelayakan yang lebih tinggi (contoh Ijazah Sarjana Muda) ke kelayakan di peringkat yang lebih rendah (contoh Diploma).

Pindah Kredit tidak dibenarkan.

- (c) Permohonan untuk mendapatkan Pindah Kredit hendaklah dibuat di Fakulti masing-masing dalam tempoh satu (1) minggu selepas pendaftaran semester pertama pelajar baharu. Bagi pelajar kanan yang telah lulus Ujian Kompetensi MOOC Universiti, mereka hendaklah membuat permohonan Pindah Kredit Tanpa Gred kepada Fakulti masing-masing pada minggu pertama setiap semester.
- (d) Kelulusan Pindah Kredit akan dimaklumkan kepada pelajar oleh PPSH melalui portal pelajar. Kursus yang diberi Pindah Kredit akan direkod dalam SPSH.

#### **(8) Kredit Kursus Gagal**

- (a) Pelajar mesti lulus dalam semua kursus yang disyaratkan untuk sesuatu program pengajiannya.
- (b) Pelajar yang gagal dalam mana-mana kursus termasuk kursus berstatus Hadir Wajib (HW) dikehendaki mengulang kursus yang sama atau setara sehingga lulus. Bagi tujuan pengiraan CGPA, Kredit Kira dan Mata Nilai Gred terakhir kursus yang diulang akan diambil kira dan kredit kira serta mata nilai yang asal dimansuhkan.

- (c) Pelajar yang gagal dalam kursus elektif tidak semestinya mengulang kursus yang sama. Bagi tujuan pengiraan CGPA, Kredit Kira dan Mata Nilai Gred kursus elektif baru akan diambil kira dan Kredit Kira serta Mata Nilai Gred yang asal dimansuhkan.
- (d) Pelajar yang gagal dalam kursus Bahasa Ketiga atau Ko-kurikulum dibenarkan mengulang kursus yang lain di dalam pilihan Bahasa Ketiga dan Ko-kurikulum. Bagi tujuan pengiraan CGPA, Kredit Kira dan Mata Nilai Gred kursus baru akan diambil kira dan Kredit Kira serta Mata Nilai yang asal dimansuhkan.

**(9) Kiraan Kredit Kursus Audit**

- (a) Status Hadir Wajib (HW) diberikan kepada Kursus Audit. Kredit kursus tidak akan diambil kira dalam pengiraan GPA dan CGPA tetapi diambil kira di dalam Kredit Dapat.
- (b) Pelajar yang gagal Kursus Audit tidak dibenarkan untuk mengulang kursus.

**(10) Kredit Naik Tahun**

Status tahun pengajian pelajar ditentukan oleh jumlah Kredit Dapat yang diperolehi. Pelajar akan naik tahun mengikut kiraan berikut:

$$KD \geq (JKL - 6)$$

JKL ialah jumlah kredit lazim yang ditentukan oleh Fakulti untuk tahun pengajian sebelumnya.

Contoh:

TAHUN 1			TAHUN 2			TAHUN 3		
Sem I	Sem II	Sem Pendek	Sem I	Sem II	Sem Pendek	Sem I	Sem II	Sem Pendek
11	10	6	11	11	5	9	11	6
JKL=27			JKL=54			JKL=80		

- (a) Kredit Naik Tahun Kedua ialah  
 $KD = 27 - 6 = 21$
- (b) Kredit Naik Tahun Ketiga ialah  
 $KD = 54 - 6 = 48$
- (c) Kredit Naik Tahun Keempat ialah  
 $KD = 80 - 6 = 74$

## **BAHAGIAN V**

### **5. PENILAIAN**

#### **(1) Skim Penilaian**

- (a) Penilaian pembelajaran termasuk Latihan Industri dalam sistem semester dilakukan dalam bentuk sumatif dan formatif secara berkala dan berterusan berdasarkan kerja-kerja yang dibuat dalam tempoh minggu perkuliahan sesuatu semester. Pelajar harus sentiasa bersiap sedia menghadapi sebarang bentuk penilaian. Penilaian dibuat dalam dua kaedah iaitu kerja kursus dan peperiksaan akhir.
- (b) Wajaran Kerja Kursus dan Peperiksaan Akhir adalah seperti Jadual 9.

**Jadual 9: Wajaran Kerja Kursus dan Peperiksaan Akhir**

Penilaian	Kursus Kejuruteraan	Kursus Teknologi Kejuruteraan Dan Selain Kursus Kejuruteraan
Kerja Kursus	$\leq 40\%$	$\geq 60\%$
Peperiksaan Akhir	$\geq 60\%$	$\leq 40\%$

- (c) Penilaian mengikut wajaran selain daripada perenggan (a) dan (b) di atas juga boleh dilakukan jika difikirkan sesuai oleh Fakulti dengan kelulusan Senat.
- (d) Kerja Kursus terdiri daripada kuiz, ujian, tugas, amali, projek, kajian kes, lawatan industri dan sebagainya.

#### **(2) Syarat Menduduki Penilaian**

- (a) Pelajar hendaklah menghadiri sepenuhnya masa pertemuan dan/atau aktiviti berkaitan yang ditetapkan bagi sesuatu kursus termasuk Latihan Industri.
- (b) Pelajar yang kehadiranya kurang daripada 80% dalam:
  - (i) bentuk masa pertemuan;
  - (ii) penglibatan dalam aktiviti berkaitan yang ditetapkan dalam sesuatu kursus; atau
  - (iii) bentuk masa pertemuan dan penglibatan dalam aktiviti berkaitan yang ditetapkan dalam sesuatu kursus, hendaklah dihalang daripada

mengikuti sebarang bentuk masa pertemuan seterusnya, penilaian kerja kursus dan peperiksaan akhir.

- (c) Tatacara tindakan ke atas pelajar yang tidak menghadiri masa pertemuan dan/atau aktiviti berkaitan yang ditetapkan bagi sesuatu kursus tanpa sebab adalah seperti berikut:
- (i) Pelajar akan diberi surat peringatan dan amaran.
  - (ii) Surat peringatan dan amaran kepada pelajar akan dikeluarkan oleh pensyarah yang berkenaan menggunakan borang yang ditetapkan oleh Universiti.
  - (iii) Apabila ketidakhadiran seseorang pelajar untuk sesuatu kursus itu melebihi 20%, maka pensyarah tersebut akan melaporkan kes kepada Dekan Fakulti pelajar menggunakan borang yang ditetapkan Universiti.
  - (iv) Setelah membuat pertimbangan, Dekan Fakulti boleh mengambil tindakan dengan memaklumkan kepada pelajar bahawa pelajar tidak dibenarkan mengikuti apa jua bentuk masa pertemuan dan/atau aktiviti berkaitan yang ditetapkan di dalam kursus dan menduduki sebarang bentuk penilaian. Seterusnya pelajar akan diberi markah sifar (0) bagi kursus berkenaan.

### **(3) Penilaian Kerja Kursus**

Penilaian Kerja Kursus boleh dilaksanakan seperti berikut:

#### **(a) Kuiz**

Kuiz merupakan soalan jawapan pendek, soalan pelbagai pilihan, atau soalan berbentuk ‘isi tempat kosong’ yang bertujuan untuk menguji kefahaman pelajar terhadap kuliah yang diikuti. Tempoh kuiz lazimnya 15 minit.

#### **(b) Ujian**

Ujian terdiri daripada soalan yang bertujuan untuk menguji kefahaman pelajar dengan lebih mendalam dan penggunaan ilmu yang telah dipelajari. Tempoh ujian lazimnya ialah 1 jam.

**(c) Tugasan**

Tujuan tugasan adalah untuk melatih pelajar membuat rujukan atau kajian secara kendiri dan mempersesembahkannya sebagai laporan ilmiah. Ia juga boleh merupakan suatu cara di mana pelajar dapat melengkapkan lagi nota kuliah dan melatih mereka menyelesaikan masalah yang berkaitan dengan topik yang dipelajari. Tugasan boleh diberi seperti berikut:

- (i) Menyelesaikan masalah, menulis eseai atau membuat laporan mengenai topik khusus.
- (ii) Kerja yang memerlukan pembelajaran secara rujukan atau menggunakan perisian dan pengaturcaraan komputer untuk menyelesaikan sesuatu masalah.
- (iii) Laporan teknikal seperti laporan amali/ujikaji.
- (iv) Tugasan boleh diberi dan diarahkan untuk dibuat sama ada secara individu atau berkumpulan.

**(d) Penilaian Kerja Kursus juga boleh dibuat dalam bentuk lain dengan persetujuan Fakulti.**

**(4) Peperiksaan Akhir**

- (a) Peperiksaan Akhir diadakan dalam tempoh dua (2) minggu di hujung semester bagi Semester Lazim dan tempoh satu (1) minggu di hujung semester bagi Semester Pendek. Ia merupakan penilaian terakhir bagi kursus tertentu yang telah ditetapkan oleh Fakulti.
- (b) Tempoh masa bagi peperiksaan akhir kursus lazimnya mengikut kredit kursus seperti di dalam Jadual 10.

**Jadual 10: Hubungan Kredit Kursus dan Tempoh Peperiksaan Akhir Kursus**

Kredit Kursus	Tempoh Peperiksaan Akhir Kursus
1	1 jam
2	1.5 – 2 jam
3	2 – 3 jam

- (c) Tempat dan masa untuk mengadakan peperiksaan akhir hendaklah ditentukan oleh Universiti. Pelajar boleh dibenarkan untuk mengambil peperiksaan akhir di tempat selain dari yang ditentukan oleh Universiti tertakluk kepada syarat-syarat dibawah:
- (i) Pelajar hendaklah memohon secara bertulis kepada Dekan Fakulti sebelum peperiksaan akhir kursus bermula;
  - (ii) Alasan yang dikemukakan adalah berhubung keadaan kesihatan diri pelajar;
  - (iii) Pelajar perlu mengemukakan sijil cuti sakit atau surat pengesahan yang dikeluarkan oleh Pegawai Perubatan hospital/klinik kerajaan atau Pegawai Perubatan Universiti tidak lewat daripada 24 jam selepas mendapat sijil cuti sakit atau surat pengesahan tersebut.
  - (iv) Sekiranya pelajar mengemukakan Sijil Cuti Sakit atau surat pengesahan daripada hospital/klinik swasta, dokumen tersebut hendaklah disertakan bersama-sama pengesahan daripada Pegawai Perubatan Universiti atau hospital/klinik kerajaan.
  - (v) Jika diluluskan, pelajar hendaklah tertakluk kepada jadual, tempoh masa, serta kaedah pengendalian peperiksaan akhir semester yang sama seperti pelajar lain.

**(5) Peperiksaan Khas**

- (a) Pelajar boleh memohon untuk menduduki Peperiksaan Khas tertakluk kepada kelulusan Senat. PPSH akan menghantar surat kepada Fakulti untuk mengadakan Peperiksaan Khas. Pihak Fakulti akan menguruskan sendiri urusan perjalanan Peperiksaan Khas.
- (b) Peperiksaan Khas bagi Semester I mesti diadakan tidak lewat dari dua (2) minggu selepas bermula Semester II. Bagi Semester II, Peperiksaan Khas hendaklah diadakan tidak lewat daripada tiga (3) minggu selepas keputusan Semester II diumumkan. Peperiksaan Khas bagi Semester Pendek hendaklah diadakan tidak lewat daripada minggu pertama (1) Semester I.
- (c) Peperiksaan Khas boleh diadakan bagi kes-kes berikut:

**(i) Kes Kesihatan**

- (a) Pelajar yang tidak dapat menduduki peperiksaan akhir semester kerana mendapat cuti sakit oleh Pegawai Perubatan Universiti atau hospital/klinik kerajaan dengan syarat pelajar mesti mengemukakan Sijil Cuti Sakit kepada Fakulti tidak lewat daripada dua puluh empat (24) jam selepas masa peperiksaan kursus yang berkenaan dimulakan kecuali atas sebab yang boleh diterima oleh Universiti. Jika pelajar mendapat Sijil Cuti Sakit daripada hospital/klinik swasta, ia perlu disahkan oleh Pegawai Perubatan Universiti atau Hospital/Klinik Kerajaan.
- (b) Keputusan pelajar akan dicatatkan sebagai Tidak Selesai (TS) sehingga keputusan Peperiksaan Khas diperolehi.
- (c) Keputusan Peperiksaan Khas pelajar akan diambil kira dalam pengiraan Kredit Dapat dan Kredit Kira untuk penentuan GPA dan CGPA serta Kedudukan Akademik pelajar.

**(ii) Kes Pelepasan Majikan**

- (a) Pelajar tidak dapat hadir peperiksaan akhir atas alasan tidak mendapat pelepasan majikan. Surat rasmi majikan perlu disertakan.
- (b) Keputusan pelajar dan Keputusan Peperiksaan Khas adalah merujuk kepada subtopik 5c (1) perenggan (i) (b) dan (c).

**(iii) Kes Musibah**

- (a) Pelajar yang ditimpa musibah (seperti kemalangan, bencana alam atau kematian ibu bapa serta waris terdekat atau atas kepentingan negara. Pelajar dikehendaki untuk mengemukakan pemohonan beserta dengan bukti yang telah diperakui oleh Fakulti kepada PPSH.
- (b) Keputusan pelajar dan Keputusan Peperiksaan Khas adalah merujuk kepada subtopik 5c(1) perenggan (i) (b) dan (c).

**(iv) Kes Pelajar Semester Akhir**

- (a) Bagi kes pelajar semester akhir, pelajar yang dibenarkan mengambil Peperiksaan Khas adalah:

- (i) pelajar yang lulus dengan KB, tetapi gagal dalam satu kursus ulangan (UM) dengan syarat kursus tersebut telah diambil setiap kali ianya ditawarkan.
- (ii) pelajar yang lulus dengan KB, tetapi gagal dalam satu kursus pada dua (2) semester terakhir dan pelajar belum mencapai tempoh maksimum pengajian.
- (b) Keputusan Peperiksaan Khas akan dicatat dalam transkrip keputusan peperiksaan sebagai 'Lulus Peperiksaan Khas (LPK)' dan diberi gred HL atau 'Gagal Peperiksaan Khas (GPK)' dan diberi gred HG bagi kursus tersebut. Jika lulus, kredit kursus ini akan diambil kira dalam Kredit Dapat tetapi tidak dikira dalam pengiraan GPA dan CGPA. Markah kerja kursus yang asal tidak diambil kira. Hanya markah Peperiksaan Khas sahaja yang diambil kira dan dihadkan kepada 40% sahaja.
- (c) Jika pelajar gagal Peperiksaan Khas ini, pelajar dikehendaki mengulang kursus itu pada semester di mana ianya ditawarkan dan perlu mendaftar sebagai pelajar separa masa selagi pelajar belum menggunakan tempoh maksimum pengajian.
- (d) Fakulti juga boleh membenarkan pelajar tersebut mendaftar sebagai Pelajar Khas pada minggu 1 hingga 2 semester berikutnya. Pelajar tidak diwajibkan hadir jam pertemuan. Penilaian adalah berasaskan kepada markah kerja kursus semester sebelumnya dan markah peperiksaan akhir semester yang baharu. Jika lulus, kredit kursus ini akan diambil kira dalam Kredit Dapat dan dikira dalam pengiraan GPA dan CGPA.
- (e) Peperiksaan Khas tidak boleh diadakan bagi kes-kes seperti berikut:
  - (i) Kursus yang tidak ada peperiksaan akhir.
  - (ii) Pelajar yang tidak menduduki peperiksaan akhir tanpa sebab yang boleh diterima oleh Senat.

**(6) Penilaian Projek Sarjana Muda**

- (a) Projek Sarjana Muda (PSM) terdiri daripada dua bahagian iaitu PSM I dan PSM II yang dinilai dan ditawarkan secara berasingan.
- (b) PSM I adalah kursus pra-syarat lulus kepada kursus PSM II.
- (c) Kaedah penilaian bagi PSM ditentukan oleh Fakulti. Lazimnya, penilaian PSM dibuat menerusi laporan, pembentangan pelajar, hasil kerja dan laporan akhir yang merangkumi kerja-kerja yang dibuat dalam PSM I dan PSM II.
- (d) Laporan akhir PSM perlu disediakan dalam salinan keras yang dijilid mengikut ketetapan Fakulti dan salinan lembut dalam medium yang bersesuaian.
- (e) Fakulti perlu merekodkan markah melalui SPSH dalam tempoh yang ditetapkan seperti mana-mana kursus lain.
- (f) Keputusan peperiksaan pelajar akan digantung sekiranya laporan akhir PSM tidak lengkap atau tidak mengikut ketetapan Fakulti.

**(7) Penilaian Latihan Industri**

- (a) Penilaian Latihan Industri (LI) dilaksanakan oleh Fakulti dan industri.
- (b) Kaedah penilaian bagi LI ditetapkan oleh Fakulti. Lazimnya, penilaian LI dibuat berdasarkan laporan Penyelia Industri, laporan Penyelia Universiti, laporan harian pelajar, pembentangan pelajar dan laporan akhir yang merangkumi kerja-kerja dan pengalaman yang diperolehi semasa menjalani latihan.
- (c) Bagi program Ijazah Sarjana Muda selain Kejuruteraan, Fakulti perlu menyerahkan markah Latihan Industri di dalam tempoh yang ditetapkan. Bagi program Ijazah Sarjana Muda Kejuruteraan dan semua program Diploma, markah Latihan Industri diserahkan pada Semester Lazim berikutnya.
- (d) Bagi Latihan Industri program Ijazah Sarjana Muda selain kejuruteraan, markah diberi secara berasingan kepada dua bahagian (Latihan Industri dan Laporan Latihan Industri). Jika pelajar gagal bahagian Latihan Industri, Laporan Latihan Industri diberi status Tarik Diri (TD) secara automatik.

- (e) Maklumat lengkap berkaitan penilaian Latihan Industri boleh dirujuk kepada Garis Panduan Latihan Industri oleh Pusat Jaringan Industri dan Masyarakat (PJIM).

**(8) Rayuan Keputusan Gred Kursus**

- (a) Pelajar boleh membuat rayuan keputusan gred kursus mengikut syarat-syarat dan di dalam tempoh yang ditetapkan oleh Universiti.
- (b) Di dalam tempoh tujuh (7) hari selepas hari terakhir minggu peperiksaan akhir, Pensyarah yang memeriksa skrip jawapan pelajar akan memasukkan markah dan mengira gred bagi setiap kursus. Gred akan dipamerkan di portal pelajar untuk semakan selepas tempoh tersebut.
- (c) Sekiranya pelajar tidak berpuas hati dengan keputusan yang telah diperolehi, pelajar boleh memohon secara rasmi kepada Fakulti untuk penyemakan semula gred kursus.
- (d) Pelajar hendaklah membuat rayuan keputusan gred kursus di dalam tempoh tujuh (7) hari selepas keputusan dipamerkan di portal pelajar.
- (e) Rayuan hendaklah menggunakan borang yang diperolehi dari PPSH. Pelajar hendaklah menyerahkan borang rayuan tersebut kepada PPSH selepas membuat bayaran pada kadar RM50.00 bagi satu kursus. Bayaran ini tidak akan dikembalikan jika pelajar berjaya atau gagal di dalam rayuannya.
- (f) Sekiranya ada rayuan, PPSH akan berhubung dengan Fakulti yang menawarkan kursus berkenaan. Fakulti bertanggungjawab menyemak dan menanda semula skrip jawapan peperiksaan pelajar yang berkenaan.
- (g) Fakulti hendaklah melaporkan hasil semakan kepada PPSH dan keputusan permohonan rayuan akan dikemaskini di dalam SPSH.
- (h) Keputusan rayuan akan dimaklumkan kepada pelajar oleh PPSH.
- (i) Rayuan yang diterima selepas tempoh atau tidak mengikut prosedur di atas tidak akan dilayan.

**(9) Pengendalian Peperiksaan Akhir**

**(a) Penyeliaan Peperiksaan**

- (i) Penyelia Peperiksaan ialah Pendaftar.

- (ii) Penyelia Peperiksaan bertanggungjawab untuk menentukan peperiksaan berjalan dengan pengawasan rapi dan tertib.
- (iii) Apabila peperiksaan terganggu oleh keadaan diluar jangka, contohnya putus bekalan elektrik, gangguan haiwan liar dan pelajar-pelajar telah menerima kertas soalan, Ketua Pengawas hendaklah memberhentikan peperiksaan serta merta dan pelajar-pelajar dikuarantinkan di dalam Dewan Peperiksaan dalam jangka masa tiga puluh (30) minit dari masa gangguan berlaku dan Ketua Pengawas perlu memaklumkan kepada Penyelia Peperiksaan. Sekiranya gangguan diselesaikan dalam masa tiga puluh (30) minit, Ketua Pengawas hendaklah meneruskan peperiksaan dan masa tambahan akan diberikan selama tempoh gangguan berlaku. Sekiranya gangguan tidak dapat diselesaikan dalam tempoh tiga puluh (30) minit, Ketua Pengawas hendaklah memaklumkan Penyelia Peperiksaan. Ketua Pengawas hendaklah juga memaklumkan kepada pelajar bahawa peperiksaan dibatalkan dan akan dijadualkan semula ke suatu tarikh lain.
- (iv) Penyelia Peperiksaan akan melantik Ketua Pengawas, Pengawas dan Pembantu Pengawas bagi setiap peperiksaan akhir semester. Pengawas hendaklah terdiri dari staf akademik. Pembantu Pengawas pula terdiri daripada staf bukan akademik.
- (v) Ketua Pengawas, Pengawas dan Pembantu Pengawas peperiksaan adalah bertanggungjawab kepada Penyelia Peperiksaan.

**(b) Pengawasan Peperiksaan Akhir**

- (i) Di dalam tiap-tiap satu peperiksaan seseorang Pengawas hendaklah bertanggungjawab untuk mengawas peperiksaan.
- (ii) Sekurang-kurangnya dua (2) orang Pengawas dilantik bagi sesuatu Dewan Peperiksaan. Seorang daripada mereka akan dilantik sebagai Ketua Pengawas dan seorang lagi sebagai Penolong Ketua Pengawas. Staf akademik terkanan hendaklah dilantik sebagai Ketua Pengawas Peperiksaan. Nisbah pengawas pelajar adalah 1:40 tidak termasuk Ketua Pengawas.

- (iii) Tanggungjawab Ketua Pengawas/Penolong Ketua Pengawas
  - (a) Ketua Pengawas dan Penolong Ketua Pengawas hendaklah melaporkan diri kepada Penyelia Peperiksaan atau wakilnya bermula satu (1) jam sebelum peperiksaan dimulakan. Ketua Pengawas akan mendapatkan sampul surat yang termateri mengandungi kertas soalan dan senarai nama pelajar yang mengambil peperiksaan daripada Penyelia Peperiksaan atau wakilnya.
  - (b) Ketua Pengawas/Penolong Ketua Pengawas hendaklah mendarahkan Pembantu Pengawas mengatur buku jawapan, bahan-bahan rujukan tertentu yang dibenarkan dan lain-lain keperluan di atas meja pelajar dan mestilah siap tidak lewat daripada lima belas (15) minit sebelum peperiksaan bermula.
  - (c) Ketua Pengawas/Penolong Ketua Pengawas hendaklah memastikan bahawa kehadiran pelajar dicatatkan dan direkodkan dengan teliti.
  - (d) Ketua Pengawas/Penolong Ketua Pengawas akan mengumumkan peraturan-peraturan penting, masa permulaan dan masa akhir peperiksaan (Akad Peperiksaan).
  - (e) Ketua Pengawas juga hendaklah mengumumkan kepada pelajar apabila tempoh peperiksaan hanya tinggal lima belas (15) minit sahaja lagi sebelum peperiksaan berkenaan berakhir.
  - (f) Sekiranya seseorang pelajar dibenar meninggalkan Dewan Peperiksaan untuk sesuatu maksud dan kemudian kembali semula, Ketua Pengawas/Penolong Ketua Pengawas hendaklah memastikan supaya pelajar tersebut berada di dalam penyeliaan secukupnya semasa ia berada di luar Dewan Peperiksaan. Pelajar yang hendak keluar mestilah mengisi Buku Rekod Pelajar yang telah disediakan. Setiap pelajar cuma dibenarkan keluar tidak melebihi daripada lima (5) minit sahaja melainkan dengan alasan yang kukuh.

- (g) Ketua Pengawas boleh melarang pelajar yang melanggar atau tidak mematuhi peraturan peperiksaan daripada menduduki peperiksaan sesuatu kursus.
- (h) Ketua Pengawas/Penolong Ketua Pengawas hendaklah melaporkan kejadian yang melanggar prosedur dan peraturan peperiksaan kepada Penyelia Peperiksaan atau wakilnya dengan serta merta.
- (i) Ketua Pengawas boleh membenarkan pelajar meninggalkan Dewan Peperiksaan sekiranya pelajar hendak menyerahkan buku jawapan atau/dan kertas jawapan mereka lebih awal daripada lima belas (15) minit sebelum peperiksaan berakhir.
- (j) Ketua Pengawas mestilah mengeluarkan arahan kepada Pengawas untuk mengutip buku jawapan dan/atau kertas jawapan semasa pelajar masih duduk di tempat masing-masing. Buku jawapan dan/atau kertas jawapan yang kosong atau tidak digunakan hendaklah dikutip secara berasingan.
- (k) Ketua Pengawas bertanggungjawab atas hitungan dan pengesahan bilangan buku jawapan yang diterima.
- (l) Ketua Pengawas bertanggungjawab atas penyerahan buku jawapan dan/atau kertas jawapan kepada Penyelia Peperiksaan atau wakilnya. Buku jawapan dan/atau kertas jawapan yang kosong atau tidak digunakan hendaklah juga diserahkan.
- (m) Ketua Pengawas adalah bertanggungjawab memastikan kelincinan perjalanan peperiksaan.
- (n) Ketua Pengawas tidak boleh menangguh, menggantung atau membatalkan sesuatu peperiksaan tanpa persetujuan Penyelia Peperiksaan.
- (o) Ketua Pengawas hendaklah mengesahkan kehadiran Penolong Ketua Pengawas, Pengawas dan Pembantu Pengawas kepada Penyelia Peperiksaan atau wakilnya selepas tamat waktu peperiksaan.

**(c) Tanggungjawab Pengawas**

- (i) Pengawas adalah dikehendaki melapor diri kepada Ketua Pengawas di Dewan Peperiksaan tiga puluh (30) minit sebelum peperiksaan bermula.
- (ii) Pengawas hendaklah mengatur kertas soalan di atas meja pelajar terlebih dahulu sebelum pelajar dibenarkan masuk ke Dewan Peperiksaan.
- (iii) Dengan kebenaran Ketua Pengawas, Pengawas boleh membenarkan pelajar masuk ke Dewan Peperiksaan lima belas (15) minit sebelum peperiksaan bermula.
- (iv) Pengawas hendaklah memastikan bahawa maklumat yang tercatat di dalam Borang Kehadiran Pelajar adalah sama dengan yang terdapat dalam kad pengenalan/pasport dan/atau kad matrik pelajar dan Slip Peperiksaan sebelum mengutip borang kehadiran pelajar.
- (v) Pengawas hendaklah melaporkan kepada Ketua Pengawas sesuatu kejadian yang melanggar prosedur dan peraturan peperiksaan.

**(d) Tanggungjawab Pembantu Pengawas**

- (i) Pembantu Pengawas dikehendaki melapor diri kepada Ketua Pengawas Peperiksaan tiga puluh (30) minit sebelum peperiksaan bermula.
- (ii) Pembantu Pengawas adalah bertanggungjawab kepada Ketua Pengawas/Pengawas dan hendaklah:
  - (a) Mengagih, menyusun dan memungut semula alat keperluan peperiksaan di atas meja pelajar sebelum, semasa dan selepas peperiksaan mengikut arahan Pengawas.
  - (b) Mengiringi dan memberi penyeliaan rapi kepada pelajar yang keluar dari Dewan Peperiksaan dengan kebenaran Pengawas.
  - (c) Mengawas perjalanan peperiksaan secara berterusan dalam tempoh peperiksaan berjalan.
  - (d) Menjalankan tugas lain yang diarahkan oleh Ketua Pengawas/Pengawas.

**(e) Tatacara Pengendalian Bagi Kes Penyelewengan Akademik**

- (i) Bagi pelajar yang ditangkap atau disyaki membawa nota atau alat secara sengaja atau tidak sengaja ke dalam Dewan Peperiksaan oleh Pembantu Pengawas, Pengawas/Penolong Ketua Pengawas atau Ketua Pengawas, nota atau alat tersebut hendaklah dirampas sebagai bahan bukti yang akan dilaporkan kepada Penyelia Peperiksaan atau wakilnya.
- (ii) Laporan hendaklah dibuat oleh Ketua Pengawas dengan menggunakan Borang Laporan Tatatertib Peperiksaan dan diserahkan kepada PPSH sejurus selepas tamat peperiksaan.
- (iii) Pelajar yang ditangkap atau disyaki melakukan penyelewengan akademik hendaklah dibenarkan untuk terus menjawab soalan tersebut sehingga peperiksaan tamat.
- (iv) Kertas jawapan pelajar tersebut hendaklah diserahkan kepada pensyarah bersama dengan kertas jawapan pelajar yang lain seperti biasa untuk pemarkahan.

## **BAHAGIAN VI**

### **6. SISTEM GRED**

- (1) Pencapaian akademik pelajar dalam sesuatu kursus dinyatakan dengan gred. Hubungan antara markah, gred dan Mata Nilai Gred adalah seperti dalam Jadual 11.

**Jadual 11: Hubungan Antara Markah, Gred dan Mata Nilai Gred**

Markah	Gred	Mata Nilai Gred	Pencapaian
80 - 100	A	4.0	Cemerlang
75 - 79	A-	3.7	Cemerlang
70 - 74	B+	3.3	Kepujian
65 - 69	B	3.0	Kepujian
60 - 64	B-	2.7	Lulus
55 - 59	C+	2.3	Lulus
50 - 54	C	2.0	Lulus
47 - 49	C-	1.7	Lulus Bersyarat
44 - 46	D+	1.3	Lulus Bersyarat
40 - 43	D	1.0	Lulus Bersyarat
00 - 39	E	0.0	Gagal

- (2) Selain daripada gred di atas, gred berikut juga diguna pakai:

**Hadir Lulus (HL)** - Gred lulus bagi kursus yang didaftarkan sebagai Hadir Wajib (HW).

**Hadir Gagal (HG)** - Gred gagal bagi kursus yang didaftarkan sebagai Hadir Wajib (HW).

**Hadir Sahaja (HS)** - Gred bagi kursus yang didaftarkan sebagai Hadir Sahaja (HS).

## **BAHAGIAN VII**

### **7. KEDUDUKAN AKADEMIK**

- (1) Pencapaian keseluruhan pelajar dinilai dengan menggunakan dua ukuran iaitu Purata Nilai Gred (PNG) (*Grade Point Average (GPA)*) untuk sesuatu semester dan Purata Nilai Gred Kumulatif (PNGK) (*Cumulative Grade Point Average (CGPA)*) untuk kesemua semester yang telah diikuti. Ukuran ini seterusnya digunakan untuk menentukan Kedudukan Akademik pelajar.

#### **(a) GPA**

GPA adalah purata mata nilai gred yang diperolehi dalam sesuatu semester. Ia dikira seperti berikut:

Jumlah Mata Nilai ,  $JMN = k_1m_1 + k_2m_2 + \dots k_nm_n$

Jumlah Kredit Kira,  $JMN = k_1 + k_2 + \dots k_n$

$$GPA = \frac{JMN}{JKK} = \frac{k_1m_1 + k_2m_2 + \dots k_nm_n}{k_1 + k_2 + \dots k_n}$$

dengan

$k_n$  = Kredit bagi kursus n

$m_n$  = Mata Nilai Gred yang diperolehi bagi mata pelajaran n

Contoh pengiraan GPA adalah seperti dalam Jadual 12.

**Jadual 12: Contoh Pengiraan GPA – Semester I**

Kursus	Kredit (kn)	Markah	Gred	Mata Nilai Gred (mn)	Mata Nilai bagi Kursus (kn mn)
I	3	90	A	4.0	12.0
II	3	78	A-	3.7	11.1
III	3	67	B	3.0	9.0
IV	2	53	C	2.0	4.0
V	2	48	C-	1.7	3.4
VI	1	35	E	0.0	0.0
<b>JUMLAH</b>	<b>JKK = 14</b>				<b>JMN = 39.5</b>
	<b>JKK1= 14</b>				<b>JMN1 = 39.5</b>

GPA adalah:  $GPA = \frac{39.5}{14} = 2.82$

CGPA untuk semester pertama adalah sama dengan GPA.

(b) CGPA

**CGPA** ialah purata himpunan mata nilai yang diperolehi bagi semua semester yang telah diikuti. Ia dikira seperti berikut:

$$CGPA = \frac{JMN_1 + JMN_2 + \dots + JMN_n}{JKK_1 + JKK_2 + \dots + JKK_n}$$

dengan:

$JMN_n$  = Jumlah Mata Nilai yang diperolehi dalam semester n

$JKK_n$  = Jumlah Kredit Kira dalam semester n

Contoh pengiraan keputusan CGPA bagi pelajar Semester II adalah seperti dalam Jadual 13.

**Jadual 13: Pengiraan GPA dan CGPA bagi Semester II**

Kursus	Kredit (k <sub>n</sub> )	Markah (%)	Gred	Mata Nilai Gred (m <sub>n</sub> )	Mata Nilai bagi Kursus (k <sub>n</sub> m <sub>n</sub> )
VII	3	35	E	0.0	0.0
VIII	3	48	C-	1.7	5.1
IX	3	53	C	2.0	6.0
X	2	68	B	3.0	6.0
XI	2	78	A-	3.7	7.4
VI(UM)	1	90	A	4.0	4.0
<b>JUMLAH</b>	<b>JKK = 14</b>				<b>JMN=28.5</b>
	<b>JKK2 = 13</b>				<b>JMN2 =28.5</b>

GPA adalah:  $GPA = \frac{28.5}{14} = 2.04$

CGPA adalah:  $CGPA = \frac{JMN_1 + JMN_2}{JKK_1 + JKK_2} = \frac{39.5 + 28.5}{14 + 13} = 2.51$

dengan:

$JMN_n$  = JMN Jumlah Mata Nilai yang diperolehi dalam semester n

$JKK_n$  = Jumlah Kredit Kira dalam semester n

**Catatan:**

- (i) Contoh menunjukkan betapa pentingnya untuk mendapatkan gred yang baik bagi kursus yang mempunyai nilai kredit yang tinggi.
- (ii) CGPA semester kedua menurun kerana GPA semester kedua menurun.

**(2) Kedudukan Akademik**

- (a) Pencapaian akademik pelajar ditentukan di akhir setiap Semester seperti yang ditunjukkan dalam Jadual 14.

**Jadual 14: Kedudukan Akademik**

Kedudukan Akademik	CGPA
Kedudukan Baik (KB)	CGPA $\geq 2.00$
Kedudukan Bersyarat (KS)	CGPA $< 2.00$

- (b) Pelajar yang mendapat keputusan CGPA  $< 2.00$  akan mendapat kedudukan akademik KS dan boleh meneruskan pengajian. Walaubagaimanapun, ia tertakluk kepada syarat pendaftaran kursus bagi pelajar KS.
- (c) Pengiraan GPA dan status kedudukan akademik pelajar untuk Semester Pendek ditentukan sama seperti Semester Lazim.
- (d) Pelajar yang mendapat KS sembilan (9) kali berturut-turut termasuk Semester Pendek akan diberikan KG.
- (e) Pelajar yang mendapat KG akan diberhentikan dari pengajian
- (f) **Membaiki Kedudukan Akademik**
  - (i) Pelajar dibenarkan untuk membaiki gred kursus sepanjang tempoh pengajian dengan syarat-syarat:
    - (a) Mendapat keputusan gred D hingga B-.
    - (b) Membaiki gred kursus yang sama atau setara jika Fakulti ada menawarkan kursus tersebut.
    - (c) Pelajar tidak dibenarkan membaiki gred kursus Projek Diploma, Projek Rekabentuk Bersepadu dan Projek Sarjana Muda.

- (d) Kursus yang diulang untuk membaiki gred hendaklah didaftarkan dengan status UG.
- (ii) Gred yang terbaik di antara gred asal dan terkini akan diambil kira dalam pengiraan GPA dan CGPA.
- (g) Pelajar semester akhir yang telah memenuhi syarat jumlah Kredit Dapat untuk penganugerahan Ijazah Sarjana Muda/Diploma tetapi mendapat KS akan diberi peluang untuk membaiki Kedudukan Akademiknya dengan syarat-syarat berikut:
  - (i) Tempoh maksimum pengajian pelajar belum tamat.
  - (ii) Mengambil semula beberapa kursus dengan persetujuan Fakulti dan menggunakan status Tebus Kursus (TM).
  - (iii) Pelajar yang gagal membaiki Kedudukan Akademiknya dengan memperolehi KB akan diberi KG dan diberhentikan.

**(3) Pengumuman Keputusan Kedudukan Akademik**

- (a) Pengumuman Keputusan Gred Kursus**
  - (i) Fakulti hendaklah mempamerkan keputusan akhir gred kursus bagi setiap kursus di portal pelajar dalam tempoh yang ditetapkan oleh Universiti.
  - (ii) Pelajar dibenarkan membuat rayuan penyemakan gred kursus kepada Fakulti dalam tempoh dan mengikut prosedur yang ditetapkan.
- (b) Pengumuman Keputusan Rasmi**
  - (i) Keputusan Kedudukan Akademik pelajar akan diumumkan menerusi portal pelajar setelah disahkan oleh Senat.
  - (ii) Pelajar boleh mencetak Slip Keputusan Peperiksaan yang mengandungi GPA, CGPA, Kedudukan Akademik serta gred setiap kursus yang diperolehi bagi semester berkenaan dan menyimpannya untuk rujukan.

**(4) Senarai Dekan**

- (a) Pelajar yang mendapat  $GPA \geq 3.50$  pada Semester Lazim akan dimasukkan dalam Senarai Dekan bagi semester yang berkaitan, dengan syarat pelajar telah mendaftar kursus sekurang-kurangnya 8 kredit. Pelajar yang

mengambil kursus Latihan Industri tidak layak dimasukkan ke dalam Senarai Dekan.

- (b) Catatan “Senarai Dekan” (*Dean’s List*) akan dinyatakan dalam transkrip dan Slip Keputusan Peperiksaan.

## **BAHAGIAN VIII**

### **8. PENYELEWENGAN AKADEMIK**

- (1) Adalah menjadi satu kesalahan yang boleh dihukum di bawah Kaedah-Kaedah Universiti Teknikal Malaysia Melaka (Tata tertib Pelajar-Pelajar) 2009 bagi pelajar yang melakukan mana-mana satu atau dua atau lebih penyelewengan akademik seperti berikut:
- (a) Menciplak, menggunakan kalimat, idea atau maklumat tanpa kebenaran atau tanpa memberi rujukan penghargaan kepada penulis asal.
  - (b) Memberi atau menerima atau memiliki secara tidak sah sebarang maklumat yang ada hubungan dengan soalan peperiksaan atau penilaian sebelum atau semasa peperiksaan tersebut bermula.
  - (c) Merujuk dan menggunakan sebarang bahan rujukan di dalam atau di luar bilik peperiksaan semasa peperiksaan atau penilaian sedang berjalan kecuali yang dibenarkan oleh Ketua Pengawas/Pengawas.
  - (d) Berhubung atau cuba untuk berhubung dengan mana-mana pelajar lain dalam masa peperiksaan atau penilaian dengan apa-apa juga cara pun.
  - (e) Memberi atau menerima sebarang bantuan semasa peperiksaan atau penilaian.
  - (f) Menjawab soalan peperiksaan atau penilaian sebelum masa yang ditetapkan atau meneruskan kerja selepas masa peperiksaan atau penilaian tamat.
  - (g) Mengambil, mengubah, menyembunyi, merosak atau memusnahkan sebarang harta yang ada kaitan dengan persediaan atau penyempurnaan tugas penyelidikan atau peperiksaan atau penilaian.

## **BAHAGIAN IX**

### **9. PENGANUGERAHAN**

#### **(1) Syarat Penganugerahan**

- (a) Pelajar hanya layak dianugerahkan Ijazah Sarjana Muda atau Diploma setelah syarat-syarat berikut dipenuhi:
  - (i) Pelajar mesti mendapat KB pada semester akhir;
  - (ii) Telah lulus dalam semua kursus yang disyaratkan oleh kurikulum; dan
  - (iii) Syarat-syarat lain yang ditetapkan oleh Universiti.
- (b) Perincian mengenai syarat-syarat di atas adalah seperti yang terkandung dalam Buku Panduan Akademik Fakulti.
- (c) Kedudukan Baik Anugerah (KBA) akan diberikan kepada pelajar yang telah memenuhi semua syarat (a) di atas.
- (d) Kedudukan Baik Tamat Tempoh (KBTT) akan diberikan kepada pelajar yang tidak memenuhi syarat (a) kerana telah menggunakan tempoh maksimum pengajian.
- (e) Kedudukan Baik Tanpa MUET (KBTM) akan diberikan kepada pelajar yang gagal memenuhi syarat MUET yang telah ditetapkan oleh universiti.
- (f) Kedudukan Baik Tanpa Bahasa Melayu (KBTB) akan diberikan kepada pelajar yang gagal memenuhi syarat Bahasa Melayu/Bahasa Malaysia dan Sejarah (SPM 2013 dan ke atas) sepetimana yang telah ditetapkan oleh univeristi.
- (g) Berdasarkan permohonan Fakulti, Senat boleh memberikan kelulusan khas untuk menganugerahkan Ijazah Sarjana Muda atau Diploma kepada mana-mana pelajar yang tidak menamatkan pembelajaran kerana meninggal dunia atau hilang keupayaan secara kekal semasa pengajian tertakluk kepada Polisi Penganugerahan Ijazah, Diploma, Sijil dan Kepujian Akademik Lain Secara Aegrotat atau Anumerta.
- (h) Mana-mana pelajar yang tidak memenuhi syarat di 9 (1) di atas boleh dianugerahkan Ijazah Sarjana Muda atau Diploma dengan kelulusan khas Universiti.

- (i) Pelajar yang telah tamat tempoh pengajian tetapi tidak memenuhi syarat penganugerahan di atas akan diberikan status Kedudukan Gagal (KG) dan diberhentikan daripada pengajian.

**(2) Penganugerahan**

Pelajar semester akhir yang telah lulus semua syarat yang ditetapkan oleh kurikulum dan mendapat CGPA  $\geq 2.00$  akan dianugerahkan Ijazah Sarjana Muda dengan Kepujian atau Diploma.

**(3) Skrol dan Transkrip**

- (a) Pelajar yang mendapat KBA akan diberikan skrol yang merupakan dokumen rasmi pengesahan kelulusan pelajar.
- (b) Mod pengajian separa masa dicatatkan pada transkrip keputusan peperiksaan.
- (c) Pelajar juga akan diberi satu salinan asal transkrip yang menyatakan keputusan peperiksaan keseluruhan pengajian di Universiti.
- (d) Skrol dan transkrip hanya akan diserahkan kepada pelajar dengan syarat pelajar tidak mempunyai hutang atau lain-lain caj atau bayaran tertunggak kepada Universiti.
- (e) Skrol dan transkrip cuma dikeluarkan sekali sahaja kepada pelajar dan tidak lagi dikeluarkan untuk menggantikan yang hilang atau rosak. Sekiranya skrol dan/atau transkrip hilang atau rosak, pihak Universiti cuma dapat mengeluarkan salinan skrol atau transkrip di atas permohonan pelajar dengan mengikut prosedur dan bayaran seperti dibawah:
  - (i) Bagi kes kehilangan skrol dan/atau transkrip, pelajar perlu membuat laporan polis dan laporan tersebut hendaklah dilampirkan semasa membuat permohonan ke PPSH/Bahagian Pengurusan Akademik.
  - (ii) Bagi kes kerosakan skrol dan/atau transkrip, pelajar perlu melampirkan skrol dan/atau transkrip tersebut kepada PPSH/Bahagian Pengurusan Akademik semasa membuat permohonan.
  - (iii) Permohonan salinan skrol atau transkrip akan dikenakan bayaran RM50.00 setiap satu.

**Disahkan oleh Senat Universiti Teknikal Malaysia Melaka**

Pada

23 Disember 2021

Pengerusi

Senat Universiti Teknikal Malaysia Melaka